

17  
18  
19  
20  
21  
22  
23  
24  
25  
26  
27  
28  
29  
30  
31  
32  
33  
34  
35  
36  
37  
38  
39  
40  
41  
42  
43  
44


金石續跋


下

吉140

853-211

部-13





授堂金石文字續跋卷十

假師武億虛谷著

男穆淳編

孫承重校



宋興州新開白水路記

正書嘉祐二年  
二月在畧陽

記文撰書及篆額皆雷簡夫一人簡夫自列銜宣德郎守  
殿中丞知雅州軍州兼管內橋道勸農事管勾駐泊及提  
舉黎州兵甲巡檢賊盜公事騎都尉借緋宋史職官志崇  
寧中復置提舉兵馬提轄兵甲皆守臣兼之此題稱提舉  
黎州兵甲蓋舊有此制既罷而至崇寧始復之簡夫本傳  
用張方平薦知雅州與此題合而文載開路始末與督作  
按視之人有知興州事虞部員外郎劉拱簽署興州判官  
廳公事太子中舍李良祐權知長舉縣事順政縣令商應

知鳳州河池縣事殿中丞王令圖令圖見長子縣法興寺  
記後列前利州路諸州水陸計度轉運使兼本路勸農使  
朝奉郎守尚書主客郎中兼上輕車都尉賜紫金魚袋李  
虞卿利州路諸州水陸計度轉運使兼本路勸農使朝奉  
郎守尚書五部郎中充集賢校理輕車都尉賜緋魚袋借  
紫田諒蓋以斯役實肇于李而遂成于田也虞卿見梁適  
傳茶賈負公錢四十萬緡鹽鐵判官李虞卿案之急賈懼  
與吏爲市內交於適子弟適出虞卿提點陝西刑獄及罷  
帝卽還虞卿三司又見丁度傳通判吉州李虞卿受財免  
貼納事覺諒見朝城縣孔子廟記

造萬安橋記

嘉祐五年

記爲蔡襄撰并正書字徑五寸餘文云泉州萬安渡石橋  
始造于皇祐五年四月庚寅以嘉祐四年十二月辛未訖  
功畚趾于淵釀水爲四十七道梁空以行其長三千六百  
尺廣丈有五尺翼以扶欄如其長之數而兩之靡金錢一  
千四百萬求諸施者明年秋蒙召還京道繇是出因紀所  
作勒于岸左宋史列傳襄以樞密直學士再知福州徙知  
泉州距州二十五里萬安渡絕海而濟往來畏其險襄立  
石爲梁其長三百六十丈種蠣于礎以爲固又植松七百  
里以庇道路閩人刻碑記德召爲翰林學士三可使與此  
記合傳于召爲學士未實其年歲証之記文是爲嘉祐五  
年秋也

王世安北嶽題名

右題名正書另界畫一方其文云大宋嘉祐五年庚子歲冬十一月奉勅就差知定州曲陽縣事兼管勾北嶽廟明年夏四月二十七日到任至治平元年春二月初一日滿替赴闕謁謝聖帝祠下西頭供奉官王世安謹記宋舊制嶽瀆各廟之政令多統於本縣命京朝知縣者稱管勾廟事世安結銜爲西頭供奉官其稱管勾宜也若到任滿替之期自嘉祐六年四月至治平元年二月歷任尙少兩月蓋以就差已在庚子矣三年爲任其可推尋如是世安見王承衍傳子世安至崇儀副使通事舍人

韓愷墓誌銘

正書嘉祐七年十一月在安陽

誌載韓愷字和仲殿中丞公彥之次子嘉祐三年秋方應進士舉而兄確物故是冬其父病愷躬進藥劑晝夜侍側不解帶者累月及父之亡也哀毀過甚不能自抑旣而感疾遂不可治五年四月二十二日卒時年二十前列叔祖開府儀同三司行刑部尙書同中書門下平章事昭文館大學士監修國史上柱國儀國公琦撰并書宋史魏公本傳三年六月拜同中書門下平章事六年閏八月遷昭文館大學士監修國史封儀國公悉與此誌結銜同而開府儀同三司行刑部尙書史不及之魏公書結體純法魯公然以勳業之隆掩其書名是固君子之所期不以小技累也

贈中書令韓國華神道碑 正書嘉祐八年十一月在安陽木谷鎮

碑前列推忠協謀同德守正佐理功臣樞密使特進檢校太師行禮部尚書同中書門下平章事上柱國河南郡開國公食邑六千八百戶食實封二千四百戶富弼撰宋史宰輔表弼所授官與碑同本傳稱封祁國公進封鄭又進封韓國公致仕其初封河南郡開國公史不及之又列翰林學士兼侍讀學士朝散大夫尚書吏部郎中知制誥充史館修撰判館事輕車都尉太原郡開國侯食邑一千八百戶食實封二百戶賜紫金魚袋王珪書本傳于珪散官勳爵亦從畧焉碑載國華歷官東都事畧國華見韓忠獻傳但稱終右諫議大夫至宋史傳序官始備亦不著其監

上蔡稅又碑言為京東轉運副使傳作轉運使碑載徙峽路峽路之名見錢景謐傳安石欲令治峽路役書且委以戎瀘蠻事蓋宋名川峽四路益州梓州利州夔州也而以傳為陝西路恐失其實碑後載公六男球湖州德清尉瑄將作監主簿琚司封員外郎兩浙轉運使琬河陽司法叅軍璩秘書省著作佐郎今丞相琦傳失載球璩宜据碑補其闕

鍾宗直等題名

右題名正書字大五寸餘自左起凡七行行各六字文云鍾宗直陳延孺晁升道息道虞道決道榮道王原甫以甲辰九月來遊遂登絕口口全大澤瞰平口口觀覽之興甲

辰當爲英宗治平元年也案此題晁氏凡五人見其茨集有別息道二十二弟者兌之也和虞道二十三弟者豫之也決道念八弟得小金印以詩贈之者夫之也

書錦堂記

正書歐陽修撰蔡襄書治平二年三月在安陽

碑記韓公以武康之節來治於相乃作書錦之堂於後圃宋史本傳拜武康軍節度使久之求知相州東都事畧拜武康軍節度使知并州又知相州據是碑但稱自武康來治並無知并州之文故本傳削是不書也公出鎮凡三任鄉邦此初治相所建故記稱大丞相衛國公今集本有作魏者按傳載太后還政拜琦右僕射魏國公証之英宗紀治平元年五月戊申太后還政宰輔表於是年亦書閏五

月戊辰琦自門下侍郎兼兵部尙書同平章昭文館大學士兼修國史魏國公加尙書右僕射然則碑立於治平二年猶稱衛公與史不合殆由記文之作在治平初及立石已越歲集本俗刻不足依也

王巖叟北嶽題名

右題名正書文云魏國王巖叟沿檄之祠下治平乙巳中元乙巳英宗治平二年也案題稱沿檄之祠下蓋當時已有官守宋史本傳熙寧中韓琦留守北京辟管勾國子監又辟管安撫司機宜文字後知定州安喜縣韓魏公祠堂繪畫遺事記巖叟撰文云元豐末余爲邑於安喜以題名在治平當非知安喜時矣攷巖叟及第調欒城簿欒城與

曲陽近意其官主簿而沿檄至此與巖叟十八鄉舉省試皆第一題名隱其官階不書識量宏且遠矣

史炤題名

右題名文云缺少卿史炤自缺路轉運使奉缺還朝恭謁

祠下治平三年十月二十三日題案宋有兩史炤通鑑釋

文左宣義郎眉山史炤見可撰者名位時代皆不類攷宋

史文彥博傳少與張昇高若訥從穎昌史炤學此題稱少

卿者當卽其人炤授徒得此謂盛矣炤又見河渠志興元

府山河堰灌溉甚廣人世傳爲漢蕭何所作嘉祐中提舉

常平史炤奏上堰法獲降勅書刻石堰上

王肅北嶽題名

右題名正書文云內殿崇班知縣事王肅供奉官焦世長

奉職祝令儀縣尉劉師目同來時治平丁未自左起向右

旁有小字亦自左起云清河崔希寂癸巳季夏十六日恭

謁靈祠宋史職官志內殿崇班爲武臣階今以加於知縣

事宋制文武皆得互借也志載西頭供奉官東頭供奉官

稱三班奉職今題惟署奉職及供奉官不言西頭東頭及

三班蓋略之不書

閻詢題名

右題名正書在華嶽碑頌之後文云諫議大夫閻詢還朝

恭謁金天帝戊申重陽日二子籍簡侍行宋史列傳詢字

議道神宗初轉右諫議大夫改邠同二州提舉上清太平

宮戊申為神宗熙寧元年與傳言神宗初者合詢蓋于時還朝則以提舉優閒遂落職也傳言右諫議大夫未若題名自署諫議大夫者為著其實

劉忱題名

題名正書在華嶽頌碑後下方自左起文云熙寧辛亥孟夏二十日提點刑獄尚書職方郎中劉忱之任蒲中恭謁祠下男唐工唐老唐純唐傑唐詢侍行宋史神宗紀熙寧

七年三月丙辰遼遣林牙蕭裕來言河東疆界命太常少

卿劉忱議之此題名即其人

邵氏聞見錄熙寧七年春契丹遣沈使蕭禧來言代北對

境有侵地請遣使分畫神宗許之而難其人執政議遣太常少卿判三司開折司劉公忱為使忱對便殿抗議以地不可棄執政罷忱為三

司鹽鐵判官較紀為詳

事乃請設置官屬神宗使自擇之向於是辟劉忱衛琪孫

珪張穆之陳倩為屬東都事畧劉煜傳子几知名忱為監

司郡守有聲忱子唐老見陳祐傳按賈易岑象求豐稷張

耒黃庭堅龔原晁補之劉唐老李昭玘人才均可用東都

事畧亦言忱子唐老元祐中為右正言若提點刑獄而云

之任蒲中地里志熙寧五年置官內有於永興軍提點刑

獄於河中府置司然則蒲中提點刑獄司署所在也

潘孝知北嶽題名

右題名正書文云治平丁未授勅差知曲陽縣事是年九

月十八日到任至熙寧庚戌孟冬初四日替歸闕下供奉

官滎陽潘孝知謹記宋史職官志縣令任滿有政績則與



升擢乾道以後定以三年爲任此題所記丁未九月到任  
庚戌孟冬替歸亦符三年之限然則三年爲任不沿於乾  
道以後矣選舉志紹興五年有請令江淮官久任而課其  
功過者帝曰朕昔爲元帥時見州縣官以三年爲任此其  
徵也

修晉太尉嵇公廟碑

正書熙寧三年  
八月在湯陰

廟記縣令張君楸修葺始末後列銜司徒兼侍中判大名  
府兼北京留守司事大名府路安撫使魏國公韓琦記並  
書宋史本傳熙寧元年七月復請相州以歸河北地震河  
決徙判大名府充安撫使按之碑所刊銜兼北京留守司  
事則略而不書也傳前神宗初詔判相州未蒞官遂改

判永興後熙寧改元請判相州故碑云余嘗兩守鄉邦蓋  
自紀其實

### 陳繹題名

右題名行書鑽空題在華嶽頌碑之中文云熙寧二年九  
月守彰化十一月移本路轉運副使制置解鹽使明年十  
一月移京東轉運使十二月三日過華陰河南陳繹題應  
體用科彥古進士彥恭彥成侍行馮翊保定二解元盧口  
趙豫同謁于金天祠下宋史繹本傳神宗立爲陝西轉運  
副使與題名合而制置解鹽使亦同在一時竟佚不見錄  
又爲京東轉運使史亦失載彥古彥恭彥成三人當是繹  
諸子彥古以應體用科入銜選舉志景德二年增置科目

有才識兼茂明于體用却掃編亦言景德中詔置制科內  
有明于體用彥古所謂應體用科也錢少詹事跋延慶禪  
院舍利塔記謂宋人由制科入等得官者甚多以應科繫  
銜獨馬元頰一人案之此題陳彥古又其一矣

孫純題名

右題名正書在汝州淨因寺文云熙寧五年壬子歲春正  
月詔舉秦王宮諸喪耐于臨汝脾山悼園之次以入內供  
奉王修已爲監護又以入內供奉曹貽孫專治脾山之役  
自三月辛卯始事至四月丁巳成功至五月壬寅送克襄  
事時祇役與執事者凡九人都巡檢供備使王懷誼提轄  
從人管勾婦居內侍供奉張繼緒藍克寧監墳園供奉嚴

雍梁魯巡檢侍禁高德誠按頓遞殿直石繼道夏大卞梁  
縣尉校書郎吳道簽書汝州判官殿中丞孫純宋史魏悼  
王傳真宗卽位追復秦王又咸平二年閏三月詔擇汝鄧  
地改葬汝州梁縣之新豐鄉題名稱耐于悼園之次蓋由  
此也廷美憂悸死于非命史旣歷著其歿後存恤之典至  
其宮中諸喪耐葬賴詔旨爲之營護則文不具詳護王宮  
之喪使職亦設供備頓遞而不見諸志文臨事更制事畢  
卽停也又稱管勾婦居結銜他文亦不見

孫固題名

右題名正書在汝州淨因寺文云宋宗陳國公以熙寧六  
年正月甲寅薨有詔葬于汝州梁縣秦悼王墳之次及舉

諸喪祔焉以龍圖閣直學士諫議大夫孫固西作坊使入  
內副都知王昭明爲監護以入內供奉梁佐衛尉寺丞簽  
書汝州判官劉唐憲專董塋兆之役自三月庚午經始迄  
六月壬子遂克葬時與執事者凡十三人提舉諸司入內  
供奉李憲專管勾諸司人內殿頭蔣良臣都巡內殿崇班  
劉允和管轄墳園供奉嚴雍梁魯縣巡檢供奉王翊按頓  
供奉曹軫侍禁王士章冬官正楊茂先梁縣尉校書郎吳  
道翰林書藝馬士明書宋史宗室諸王傳元傑改陳王無  
子仁宗以恭憲王之孫允言子宗望爲之後宗望子仲郃  
熙寧三年與商恭靖王孫宗肅等同日封陳國公官至陳  
州觀察使卒諡良僖今題稱陳國公當卽其人也又王

監護案吳育傳自秦悼王葬汝州後子孫從葬皆出宦官  
典護孫固傳稱固加龍圖閣直學士不載爲諫議大夫宰  
輔表元豐元年書孫固自權知開封府樞密直學士右諫  
議大夫除同知樞密院事于前熙寧六年不載爲諫議大  
夫史從畧也李憲亦見宦者傳皇祐中補入內黃門稍遷  
供奉官神宗卽位歷承興太原府路走馬承受數論邊事  
合旨幹當後苑此題憲當熙寧六年猶爲供奉而傳書其  
爲走馬承授卽于神宗卽位時當日得君之心何其驟也  
翰林書藝職官志翰林院勾當官一員總天文書藝圖書  
醫官四局是翰林有書藝局故當時用以結銜  
祖無擇寇仲武題名

右題名正書在登封文云范陽祖無擇上谷寇仲武遊熙  
寧癸丑孟春二日祖無擇宋史有傳云字擇之上蔡人此  
題言范陽舉郡望也無擇當熙寧初爲安石中傷謫忠正  
軍節度副使尋復光祿卿秘書監集賢院學士主管西京  
御史臺此題癸丑爲熙寧之六年當安石見忌用王子韶  
按治時亦漸遠矣天固使之投閒以佚其志耶

蔡延慶題名

右題名行書鑽空題名在華嶽頌碑之後文云治平丁未  
夏領本路提點刑獄謁祠下後六年蒙恩除天章閣待制  
秦鳳等路都轉運使過祠下謁金天帝宋熙寧六年癸丑  
正月二十九日東萊蔡延慶仲遠題宋史列傳延慶提點  
京東陝西刑獄與前題領本路提點刑獄合傳又云同修  
起居注直舍人院判流內詮拜天章閣待制秦鳳等路都  
轉運使亦與此題合

劉航題名

右題名正書題在後周華嶽頌碑前一行字大徑寸餘文  
云河南監牧使劉航仲通提舉牧羊公事邱舜中聖徒同  
謁祠下熙寧癸丑仲秋十七日題航見兵志云自熙寧元  
年手詔議馬政後樞密院又言舊制以左右騏驎院總司  
國馬景德中始增置羣牧使副都監判官以領廐牧之政  
使領雖重未嘗躬自巡察不能周知牧畜利病以故馬不  
蕃息今宜分置官局專任責成乃詔河南北分置監牧使

授金石文字續跋卷十  
以劉航崔台符爲之航又附見子安世傳以羣牧判官爲  
河南監牧使悉與題名合又兼牧羊公事案職方志稱鹽  
鐵分掌七案六曰騎案掌諸坊監院務飼養牛羊馬畜及  
市馬等則諸監宜有牧羊公事矣史文不備錄此可補闕  
于紳題名

石題名正書在登封中嶽廟唐尉遲汾狀嵩高靈勝詩石  
刻之後文云余被詔禱雨於縣祠獲是石于圮墻之下遂  
移置壁間庶圖傳之永也熙寧丁巳季春日口侍大梁王  
紳丁巳爲神宗熙寧十年按組是年三月不書遣使者分  
禱嶽廟之事早未太甚故也紳被詔之來必不能以久淹  
而珍惜古刻至於移置妥帖如其與世異趣者畧見是  
矣

張叔卿題名

右題名正書在華嶽頌碑之後上方文云張叔卿被命之  
利路共謁祠下男試秘書省校書郎康伯侍行熙寧十年  
三月十九日題元豐九域志宋史地理志並言利州路而  
叔卿淮言之利路省州字案吳昌裔傳利路轉運使曹彥  
約傳以爲利路轉運判官兼知利州高斯得傳授利路觀  
察推官邵伯溫傳除利路轉運副使見諸史文亦如此當  
時稱利路必有謂也

郝闢之題名

右題名正書文云汝南郝闢之希孟鄭圃周永年延之西

水陳知權仲與熙寧丙辰季春二十二日同遊超化寺案  
嵩陽石刻題名內有稱淮西郝闢之者即其人汝南舉古  
郡名淮西舉路名其實一也神宗紀熙寧五年九月淮南  
為東西路至丙辰已當九年矣闢之所題從新制故也

淨因院主贊大師墓誌銘

正書在汝州元豐元年十二月

誌銘載師諱因贊字公禮俗姓張許州舞陽縣人嘉祐元  
年遇乾元聖節恩許披剃乃落髮為沙彌明年受具戒至  
元豐元年皇祖河州相公喜師幹治之勤奏請于上賜紫  
衣以勞之是年十一月十日感疾卒即以十二月三日葬  
師于院之西北隅其乞為之銘者監墳奉職郎鄧思忠而  
撰書是銘者則將仕郎前守魯山縣令魯公弼也宋史禮  
志仁宗以四月十四日為乾元節案聖節恩例在景德二  
年僧道已賜紫衣師號至仁宗朝又于僧徒恩許披剃史  
不具載也

慈林山法興寺新脩佛殿記

正書元豐四年正月在長子縣

碑列龍圖閣直學士太中大夫權判尙書吏部兼判昭文  
館太原郡侯王益柔記嵐州團鍊推官畢仲荀書并篆額  
益柔見宋史列傳書其歷官惟有判吏部流內銓及遷龍  
圖閣直學士與碑題銜符其太中大夫兼判昭文館太原  
郡侯皆失載記文稱法興寺始子後魏神口易新于唐之  
咸亨越宋建隆初僧凝誨諦構復完天聖中釋法信與麻  
衣從深又闢其基今主其事者則為紹榮也佛殿既成榮

以書來請而益柔感此寺爲其大父嘗所游息及其先子  
誕育之地益柔父名曙字晦叔史有傳言其世居河汾後  
爲河南人不著其隸長子攷邵氏見聞前錄云余爲長子  
縣尉西寺中有王文康公祠其老僧爲余言文康公之父  
邑人也以教授村童爲業有兒年七八歲不能養欲施寺  
之祖師祖師善相謂曰兒相貴可令讀書因以錢幣資之  
是謂文康公文康晦叔諡也此寺旣在長子文康之父爲  
邑人遊息于此固也而晦叔降生之地非賴記所載莫由  
知其迹矣然則邵氏所錄又証以益柔自記可以知其里  
居之詳蓋于傳非小補也碑最後列朝議大夫知潞州軍  
州事兼管內勸農使兼提舉澤州威勝軍屯駐駐泊就糧

本城兵馬巡檢公事輕車都尉太原縣開國男食邑三百  
戶賜紫金魚袋王令圖立石令圖見河渠志云外監丞王  
令圖獻議于北京又見趙瞻傳云都水王令圖請還河故  
道

### 張舜民題名

右題名正書其文云元豐五年缺元祐二年自虢還幽往

來皆拜嶽祠張舜民芸叟記石口攜往後二年歲乙亥自  
關東再過東都事略張舜民元豐中朝廷方討西夏五路  
出兵環慶帥高遵裕辟掌機宜文字遵裕敗謫監郴州酒  
稅會赦得原元祐初宰相司馬光舉舜民才氣秀異剛立  
敢言云逾年通判虢州提舉秦鳳路刑獄案此題元祐

二年卽東都事畧所謂元祐逾年也其云自號還幽尤與傳相符惟追記元豐五年之文已缺當指在靈武時以詩獲譴爾末又記後二年歲乙亥則爲紹聖改元之二年以宋史本傳攷之舜民後又加直秘閣陝西轉運使故云自關東再過其事略可推依如此

薛紹彭題名

右題名正書文云樂安薛紹彭富沙范勃元豐六年六月十六日宋史薛向傳子紹彭有文翰名按向本傳不著其占籍蓋以向爲顏孫顏已著籍河中萬泉矣而紹彭爲顏曾孫又自稱爲樂安當亦名其郡望也與揮塵後錄引蔡天啓作米元章墓碑云君與西蜀劉涇巨濟長安薛紹彭道祖友善又著籍爲長安未知孰爲審也

韓跋北嶽題名

右題名正書自左起文云安陽韓跋元豐六年仲冬知成德軍藁城縣得替已嘗恭謁祠今復自祁之鼓城解官再遂瞻拜連治二邑皆獲善罷者荷陰祐之所賜也元祐二年十一月二十七日案元豐六年仲冬迄哲宗元祐二年十一月中間凡歷四年連治二邑蓋以二年爲任者攷宋史選舉志帝曰朕昔爲元帥時見州縣官以三年爲任猶且一年立威信二年守規矩三年則務收人心以爲去計今止以二年爲任雖有葺治之心亦無暇矣由高宗所諭則三年常制亦間以二年爲之然不知此題當元祐時已



有之矣

蔡延慶北岳題名

右題名正書文云龍圖閣直學士朝散大夫定州路安撫使馬步軍都總管兼知定州蔡延慶元豐八年正月九日甲辰奉詔致祀北岳是日恭款祠下齋戒丙午祭告建道塲癸丑禮畢還簽書節度判官王庠勾當公事杜天經筦勾機宜文字趙伋走馬承受公事陳嘉言勾當公事李仲從行下又有小字雙行題云通判州事侯臨續至癸丑致祭宋史列傳延慶復龍圖閣待制帥高陽閱歲復直學士移定武職官志定州則兼安撫使馬步軍都總管題銜所稱是也志載安撫使其屬有幹當公事主管機宜文字以

題名証之則爲勾當公事主管勾機宜文字史文避高宗嫌名易勾爲幹又減管勾作主管耳王庠史有傳云字周彥閉戶窮經史百家傳注之學尋師千里究其旨歸元祐中呂陶以賢良方正直言極諫科薦之庠以宋邦傑學成未有薦者推使先就後賜號處士以卒是終身未嘗仕也與此爲判官者蓋別爲一人

薛昌朝等西岳題名

右題名文云薛昌朝昌年昌諤范師軻同謁祠下元豐戊午仲冬二十九日戊午元豐元年也昌朝見宋史李定傳定爲崇政殿說書御史林旦薛昌朝言不宜以不孝之人居勸講之地並論安石章六七上王安石傳亦載薛昌朝

論李定事昌諤見文潞公留題濟瀆廟詩石刻後題有婿薛昌諤者當即其人

薛侏題名

右題名正書文云申大夫致仕蒲津薛侏祭奠西嶽金天帝元祐元年十一月十日記男宣德郎知華陰縣事兼兵馬監押昌道孫太廟齋郎鈞鎬鈇鐸鐸偕侍江隣幾雜志薛侏比部待闕蒲中出協律郎蕭悅畫竹兩軸乃樂天作者薛蓄畫頗多此兩畫尤佳也按題名云致仕蒲津而雜志謂待闕蒲中意隣幾望其復起見用於世故以侏為非終沒退老如待闕者與富弼傳官吏息前資待缺寄居者皆賦以祿鄭毅傳令守臣體訪境內寄居待闕及見任宮觀京朝官以上各具姓名以聞侏自題中大夫惟用散官列銜

蓋致仕不帶職事官今得雜志稱為比部又知其為刑部之屬也昌道稱宣德郎知華陰縣事兼兵馬監押職官志縣令若京朝幕官則為知縣事有戍兵則兼兵馬都監或監押題名與志合志又稱致仕官員外郎已上致仕者錄其子試秘書省校書郎三丞已上為太廟齋郎無子聽降等官其嫡孫若弟姪一薛侏有子昌道而孫復緣恩錄為太廟齋郎固以昌道已有官階更推恩以及其孫與此宋制優老得盡其情如此故予不可以不詳也

郝宗臣北岳題名

右題名正書文云絳臺右通直郎知縣事郝宗臣自元祐二年十一月初九日到任至五年冬初八日終任汴都右

侍禁監廟權主簿張維周亦二年十月十九日到任至五年冬十八日終任凡三考之間幸獲風雨調順年歲豐登寇盜一空境內安枕居民樂業此荷嶽帝之垂祐也六年二月初二日謹記宋史選舉志凡考第之法內外選人周一歲爲一考欠日不得成考三考未替更周一歲書爲第一四考此二題郝宗臣自元祐二年十一月初九日到任至五年冬初八日終任張維周亦自二年十一月十九日到任至五年冬十八日終任按其日數皆周歷三歲與欠日不得成考合乃嘆昔人題名之細謹其月日亦俾後世有稽也志又載倉廩盈羨寇盜剪滅部內清肅者本道轉運司各以名聞卽題名所紀年歲豐登寇盜一空之謂宋時課績之制尤爲近古

### 杜純題名

右題名正書文云轉運使濮陽杜純挈家恭謁祠下元祐戊辰閏月初七日男開奉命書宋史列傳純字孝錫濮州甄城人元祐元年范純仁韓維王存孫永交薦之除河北轉運判官召爲刑部員外郎大理少卿擢侍御史改右司郎中尋知相州徙徐州陝西轉運使按題稱謁嶽祠則爲陝西時路經於此然元祐元年方蒙薦中隔一年至戊辰爲元祐三年而敘遷之速如此任淵后山詩註據實錄元祐二年九月知徐州杜純權陝西轉運使是二年爲誤也兩司馬公題名

右題名八分書在夏縣禹廟文云且光乙丑四年三月七日來謁禹王祠題後有正書稱先太中河內公太史温國公頃歲同謁夏禹祠太史公因留題於殿之西壁元祐己鄉人李權刻諸石乙丑為神宗元豐八年後四年則哲宗元祐四年也且宋史本傳稱且與弟光友愛終始人無間言光居洛且居夏縣皆有園沼勝槩光歲一往省且且亦間至洛視光可馬光傳亦云在洛時每往夏縣展墓必過其兄且此刻當為温公省兄時所題彦周詩話嵩山峻極中院法堂後柱間大字隸書曰且光頤來蓋河內視弟至洛所記矣温公書勁直聳峭得之尤足珍愛

韓魏公祠堂繪畫遺事記 正書元祐五年九月

碑記慶歷中魏公以資政殿學士帥定武六年乃得去去

後三十年民相與立祠于郡庠之西元豐末州之耆舊請

繪公遺事于祠堂之兩廡未暇成 民初為魏公立祠在元豐元年韓絳自河東移

知定州民請于絳立廟見忠獻公祠堂記越明年公之子忠彥出帥定定人喜

人曰吾家資政之子也因相與成之按文獻通攷慶歷八

年詔置河北四路安撫以韓琦王拱辰賈昌朝等充諸路

使碑言魏博鎮定並用儒帥是其事也忠彥本傳拜禮部

尚書以樞密直學士知定州與碑合碑前列左朝奉郎充

龍圖閣待制權知開封府兼畿內勸農使飛騎尉賜紫金

魚袋王巖叟傳左通直郎充集賢殿修撰提舉西京嵩山

崇福宮賜緋魚袋劉安世書左朝散郎試中書舍人賜紫

金魚袋韓川篆額三人宋史並有傳而巖叟尤爲魏公門下客也巖叟本傳止載權知開封府其階勳兼官悉不書惟却掃編載元祐六年王公巖叟自左朝奉郎龍圖閣待制拜樞密直學士簽書樞密院事同此碑結銜則史失之畧矣安世本傳以集賢殿修撰提舉崇福宮與碑相証符而階亦未之及川本傳進爲侍御史樞密都承旨進中書舍人蓋至此始得實任不知其初爲試中書舍人也

京兆府新移石經記

正書元祐五年九月在西安府學

記爲京兆黎持撰河南安宜之書持自云承乏雍學當汲郡呂公龍圖領漕陝右之日案呂公卽大忠宋史有傳元祐初歷工部郎中陝西轉運副使知陝州以直龍圖閣知

秦州今記所稱與史符又云石經乃唐開成中鐫刻舊在務本坊自天祐中韓建築新城而六經石本委棄于野至朱梁時劉鄩守長安有幕吏尹玉羽者白鄩請輦入城鄩方備岐軍之侵軼謂此非急玉羽給之曰一旦虜兵臨城碎爲矢石亦足以助賊爲虐鄩然之乃遷置于此卽唐尙書省之西隅也玉羽舊五代史有傳其護惜殘刻能委曲全濟功亦鉅矣長安志朱雀街東第二街北當皇城南面之安上門從北第一務本坊承天門街之東面第四橫街之北從西第一尙書省刻者安民卽黨籍碑之不附名者也

修邵陽縣學記

正書元祐八年正月在邵陽

碑載籍田令王實仲弓求時彥序記實自爲書并題額者  
文首稱邵陽令河內李百祿元祐辛未來蒞是邑首惟興  
學爲士民勸其事跡略可見百祿字祐之爲時彥友人彥  
見宋史列傳云彥字邦美開封人舉進士第歷官至吏部  
尚書卒今碑題占籍乃云陽武與史小異史著其爲開封  
人但以府名冠之豈如其自署之可徵與碑後有主簿張  
价縣尉劉熙立石字

徐震北岳題名

石題名行書文云內侍殿頭徐震奉宣以南郊禮畢醮謝  
安天元聖帝道場五晝夜管勾禮料節度推官張震提舉  
排辦權縣事康聿巡檢王寧監務任紳監廟胡良輔縣尉

王崇皆與陪祠時元祐癸酉仲春日日題案元祐癸酉爲  
哲宗卽位之八年宋史哲宗本紀七年十一月辛卯朝獻  
景靈宮壬辰饗太廟癸巳祀天地于圓邱此題所指南郊  
禮畢卽其事也越歲始遣使醮謝嶽靈蓋典禮之序如此  
韓南仲北嶽題名

右題名正書文云元祐八年五月遂城尉韓南仲沿檄之  
北寨敬謁祠下宋史地理志真定府砦一北砦咸平二年  
置南仲所之卽其地說文有柴字臣鉉等曰師行野次豎  
散木爲區落名曰柴籬後人語訛轉入去聲又別作寨非  
是題名稱寨已爲別體而志作砦亦轉木作石皆於文爲  
舛凡吏越境而出依沿檄爲文李之才傳調孟州司法參

軍後雍謫安陸沿檄見之洛陽是也南仲奉檄亦猶此例也

游師雄題名

右題名正書其文云游師雄奉使關中祭禱祠下元祐口  
年正月九日按張舜民撰游景叔墓誌銘元祐口年夏四  
月吐蕃寇邊其酋長鬼章青宜結乘間脅屬羌結夏賊爲  
亂謀分據熙河朝臣擇可使者與邊臣措置僉以公行公  
以爲奉使絕塞兵謀軍勢間不容髮俟中覆則失於機會  
欲如古者大夫出疆之事上允其請許以便宜從事此題  
所云奉使關中其事正與史符

授堂金石文字續跋卷十終

受業博山賈六吉校

授堂金石文字續跋卷十一

偃師武億虛谷著

男穆淳編

孫未重校刊

宋韓肖胄北岳題名

右題名正書文云安陽韓肖胄自定武之京師枉道恭謁  
祠下紹聖三年七月初一日張誼偕行宋史列傳肖胄以  
蔭補承務郎歷開封府司錄與府尹同對殿中徽宗問其  
家世除衛尉少卿後歷除資政殿學士知紹興府亦在南  
渡時矣但未審當紹聖三年于役定武爲何役攷韓忠彥  
傳以觀文殿學士知真定府移定州在哲宗親政後疑肖  
胄從侍於此時也

黃山谷書陰真君詩

行書

詩刻存秋碧堂後有山谷自跋云忠州丰都山仙都觀朝金殿西壁有天成四年人書陰真君詩三章余同年許少章以爲真漢人文章也案山谷所据天成四年人書予証之抱朴子云近代漢末新野陰君合此太清丹得仙其人本儒者有才思善著詩及丹經讚并序述初學道受師本末列已所知識之得仙者四十餘人晉去漢未遠抱朴所記深得其實詩內稱予得度世神丹之力蓋所云太清丹也山谷爲此書當紹聖四年四月黔州禪月樓中趨然高邁其亦有出世之思與

通利軍鐘款識

紹聖四年

鐘在孟縣城東門樓上馮魚山修志日拓其文以贈并亂

鐘之形製爲說甚悉今節錄於篇其邑人相傳此鐘自修武浮河而來按古託所言古鐘或與山應或與龍鬪者不一雖未必可盡信然物之靈異亦有難以常理測者蓋縣距修武三百餘里以數千鈞之鐘無端在此亦自不可解耳至所云懷衛州通利軍者攷宋史地理志載濬州平川軍節度本通利軍天聖元年改通利爲安利四年以衛州衛縣隸軍熙寧三年廢爲縣隸衛州元祐元年復爲軍政和五年升爲州號濬川軍節度改今額云按此則此軍初自通利改爲安利後旣廢而元祐年復爲軍者史似謂復爲安利軍而此鐘所云通利軍鑄鐘其歲爲紹聖丁丑蓋已在元祐後而仍用通利軍之名然則非復安利之名矣



蓋據此亦可補宋史之略又所云都巡檢者宋史職官志  
縣巡檢連合處則置都巡檢以總之是也而大鑿小博士  
之名不可曉或大鑿之義如工匠鑿造之類故其後卽列  
匠人母郭氏耳予謂宋志以元祐元年後爲通利軍証之  
金史地理志濬州宋大邳郡通利軍又改平川軍是宋後  
改軍額以平川目之故宋志首注濬州平川軍節度是也  
土人鑄造不因其新額仍卽本名通利呼之案河渠志于  
政和五年下云湍激暴猛遇山稍隘往往泛溢近皆民夫  
多被漂溺因以及通利軍又云八月己亥都水監言以大  
河以就三山通流正在通利之東據此當政和二年己丑  
爲州此猶以通利軍名之且上之奏疏知當時可以通  
也大鑿如監作監視之屬蓋工師也然不稱大監而易作  
鑿避與宦寺名相近豈其然與小博士爲匠役之稱宋時  
茶酒肆諸傭保皆依博士爲名蓋此鄙習所襲已久予收  
唐大歷六年同光禪師塔銘有造塔博士宋玉又得後唐  
同光四年法華鈞大德塔銘有博士侯建鑄字造塔博士  
郝溫以証此鐘識小博士爲工作無疑也至鐘自修武浮  
河而來案五行志建炎三年吉州修城役夫得髑髏棄水  
中俄浮一鐘有銘三十六字蓋金失其性則爲變怪魚山  
旣啓其端仍以鄙聞推記于後如此

岑巖起題名

右題名在襄陽謝樸園手摹寄予文云郡太守岑巖起飲

餞前熙帥鍾弱翁于此吳周臣趙德麟魏道輔李方叔俱至元符元年六月案直齋書錄解題德隅堂畫品一卷李廌方叔撰趙令時德麟官襄陽行棗中諸畫方叔皆為品評之元符元年也此題德麟方叔俱至正方叔在德麟幕時矣樸園客新野為峴山之遊遍拓諸石記自為校錄雅與不減方叔予故略著其踪迹使後有攷也

韓宗厚墓誌銘

正書元符元年九月在許州

誌載宗厚字敦夫祖諡忠憲考諱緯皇任尚書比部郎中知解州贈右光祿大夫宋史韓億傳諡忠獻與誌文異億有子八人緯亦不著其官階皆宜以誌為據誌載宗厚歷官蔭補太廟齋郎初任徐州沛縣主簿授上元縣主簿轉

光祿寺丞知温州永嘉縣簽書天平軍節度判官廳事後又簽書鎮安軍充慶成軍使兼知河中府榮河縣及管內勸農事驍騎尉賜緋魚袋即誌所云四遷而至承議郎賜六品服者也按中州金石記云宗厚不見於史予檢河渠志熙寧八年七月江寧府上元縣主簿韓宗厚引水溉田二千七百餘頃遷光祿寺丞証之誌稱宗厚授江寧府上元縣主簿大興水利溉汙萊為良田者至二千七百餘頃創為堰閘視時水旱而均節之民獲其利歌詠載涂丞相王文公為守上其狀於朝以勞應格特轉光祿寺丞即指其事是宗厚亦附見史文矣宗厚賜緋魚袋而稱六品服職官志三品已上服紫五品已上服緋九品已上服綠据

此誌則六品已得服緋與史志不合蓋元豐新制也輿服志元豐元年去青不用階官至四品服紫至六品服緋皆象笏佩魚中興仍元豐之制四品已上紫六品已上緋九品已上綠故宗厚卒於紹聖元年宜遵元豐改定章服而兩志未及對勘歸於一爾誌前列朝散郎前通判永興軍府兼管內勸農事兼陝西制置解鹽司勾當事上輕車都尉賜緋魚袋朱光裔撰光裔見鄆縣唐定慧禪師碑陰與王普題名又列朝請郎充集賢殿修撰知鄧州軍州兼管內勸農事兼京西南路安撫司公事上柱國賜紫金魚袋杜紘書哲宗紀載紹聖二年易集賢院學士為集賢殿修撰撰紘結銜稱修撰與史合又紘本傳亦載加集賢殿修撰其自知鄧州以下所兼官及勲服悉有所未及焉又列朝請大夫管勾西京嵩山崇福宮上柱國賜紫金魚袋吳安常篆蓋安常吳正肅公子見歐陽集贈吏部尚書吳公墓誌銘

韓宗道墓誌銘 正書元符二年七月在許州

誌前列朝奉大夫充集賢殿修撰知秦州軍州兼管內勸農事上輕車都尉會陞撰朝請郎試中書舍人兼侍講上輕車都尉賜紫金魚袋趙挺之書左朝議大夫寶文閣待制知潁昌軍府事兼管內勸農使京西北路安撫使柱國吳安持篆蓋肇與挺之宋史並有傳傳言肇降為滁州稍復集賢殿修撰歷秦州與銘題同而失載其勲為上輕車

都尉挺之傳惟言召試館職為秘閣校理而亦失載其試  
中書舍人兼侍講上輕軍都尉安持附吳充傳云為都水  
使者遷工部侍郎終天章閣待制亦見禮志河渠志誌文

稱宗道字持正知制誥諱綜累贈太尉為公之考綜傳又

稱子宗道歷官為戶部侍郎寶文閣待制傳文于帝曰孰有如韓綜者乎

下書子宗道為戶部侍郎傳末又書子宗道至戶部侍郎寶文閣待制文重疊未刪并其於他官治

行皆從畧予故依志文著之初以恩補將作監主簿三遷

大理評事監潁州商稅務代攝汝陰縣事嘉祐四年中進

士第知越州餘姚縣歷監在京皮角庫簽書彰德軍節度

判官事熙寧初知巴州擢成都府路轉運判官兼管勾常

平農田水利差役事入為開封府判官復出提點河北西

路刑獄徙淮南西路轉運副使兼提舉常平市易事入遷尚

書工部郎中徙知廬州歷知鳳翔府潞州官制行召為尚

書戶部郎中使契丹還歷太常太僕少卿尚書左司郎中

太府卿元祐三年擢權戶部侍郎真拜刑部侍郎未幾復

為戶部以寶文閣待制權知開封府復還戶部五遷太中

大夫紹聖初除寶文閣直學知成都府又以待制知陳州

徙青州兼京東東路安撫使徙瀛州兼高陽關路安撫使

又徙杭州而銘題則稱通議大夫充寶文閣待制上柱國

南陽郡開國侯食邑一千三百戶致仕當因徙杭州以後

謝事也

自雲山主利師塔記

正書元符二年十月在鄆縣

記稱師諱得利字子益姓王氏京兆府高陵人天禧三年  
 慶蒙睿澤削髮受具宋時於聖節恩准度僧予嘗跋贊大  
 師誌銘已具言之矣記後稱師復詣鄉邑住毗沙隆昌寺  
 毗沙鎮名元豐九域志高陵有毗沙鎮是也又度小師一  
 人惠滿實慶歷三年乾元聖節試中經義者於是又見緇  
 流亦有所挾持而宋制之嚴不令其濫託也記文為鄜峙  
 趙宗輔撰講經律論臨壇僧道雅書并題額書殊清脫不  
 凡

三十六峯賦

三十六峯賦石刻在登封縣少林寺蓋知登封縣明四樓異  
 試可所作僧曇潛書于時當建中靖國元年九月昇宋史

有傳載為進士高第但初歷官至卒皆不及知登封縣陳  
 師道面壁像記元祐二年留守簡翼張公求得面壁遺跡  
 後十有餘年知登封縣樓昇復往過之欲為修治云並  
 可舉証益知史闕錄也曇潛即參寥子與東坡倡和以詩  
 鳴者此賦所書尤得東坡之遺

太平州蕪湖縣新學記行書

碑拓本失其下半文遂不全屬擇其可見者有云崇寧元  
 年仲秋天子思欲推廣神宗皇帝三舍造士之法詔下講  
 議司條具以聞本司奏言縣邑皆得以置學率間里子弟  
 來就教育推步教條考察如法云宋史選舉志崇寧元  
 年宰臣請天下州縣並置學州置教授二員縣亦置小學

縣學生選攷升諸州學州學生每三年貢則附試別立號  
考分三等入上等補上舍入中等補下等上舍入下等補  
內舍餘居外舍碑所記卽其事撰記者禮部尙書黃裳案  
直齋書錄解題演山集六十卷端明殿學士延平黃裳冕  
仲撰元豐二年進士第一人貴顯于崇觀死于建炎書則  
米老所書自署無爲守本傳稱芾以太常博士知無爲軍  
蓋在崇寧三年是碑之立又當後於三年矣

勅賜靜應廟牒

正書在河內

牒載知河內縣事陳崇狀上清紫虛元君南嶽魏夫人廟  
祈雨應驗乞賜廟額尋下太常寺看詳隨得賜靜應廟爲  
額牒中兩勅字獨大六寸餘後題崇寧三年五月十五日

牒字又用陰文凸起皆他牒式所無又列左光祿大夫守  
右丞吳下有押字宋史宰輔表崇寧三年九月吳居厚自  
右光祿大夫尙書右丞加中書侍郎然牒下自五月載居  
厚爲左光祿大夫守右丞表蓋于其時加官脫書也又列  
司空兼左僕射下有押字表云三年五月蔡京自尙書左  
僕射加司空正與符合未列大金承安四年五月紫陵故  
醫生王口南激澤濟土石

王評題名

右題名正書自左起在唐紀功頌碑陰文云朝散大夫權  
汜水縣事上柱國杜陵王評漢卿來觀崇寧四年六月二  
十日題案西安府慈恩塔題名亦有王評自署承議郎新

通守清江郡事瑯琊王評漢卿奉使岐雍展先塋其時在元祐三年至崇寧官益顯矣但慈恩題名稱瑯琊舉其郡望而汜水題名稱杜陵以其先塋固在西安也或亦占籍于此與

濟州金鄉學記

正書大觀元年六月

記文列安定胡世將記隴西李浩書彭城劉暘題額三人皆舉郡望不繫官階又各列名在文之末與他碑書撰書者例頗小異宋史列傳世將字永公常州晉陵人宿之曾孫登崇寧五年進士第李浩字德遠其先居建昌遷臨川浩早有文稱紹興十二年進士是其人也最後結銜奉議郎知縣事兼管勾宗室財用學事尹熙立石兼管勾宗室

財用學事以此入銜他刻未見案金鄉壤接南京此地若有宗室疎屬願居在外者于時亦當置宗學于此矣又考宋朝事實蔡京乞隨所在諸官置學添教授立法教養則教授主學事而以知縣事者管勾實爲史志所逸脫得此補之信而有徵也金鄉舊有夫子祠崇寧二年詔縣皆立學知縣事睢陽徐處仁卽其地而爲之明年濟南尹熙繼宰是邑而足其功蓋熙到官當崇寧三年甲申至大觀改元越三年矣傳云處仁字擇之應天府穀熟縣人知濟州金鄉縣與題銜合書體勢深似率更宋刻本之佳類此者絕少故樂爲書之

張杲題名

大觀四年

右題名行書文云權發遣京西轉運使張杲被旨詣嵩山崇福宮安掛御賜二門牌大觀庚寅十一月二十九日至此杲宋史無傳惟王襄傳稱宣和六年起爲河南尹金人再入出爲西道都總管張杲副之然則杲爲副總管當宣和六年距大觀庚寅十有五年矣

席旦題名

政和二年

右題名正書攢空寫在唐華嶽精享昭應碑之前其文云顯謨閣直學士席旦政和壬辰再守成都恭謁祠下二月二十口日奎益從宋史本傳旦以顯謨閣直學士知成都府徙鄭州黜知滁州久之帝思其治蜀功復知成都史不著其年歲今以旦自題政和壬辰再守成都是爲政和六年也又題奎益從本傳亦載子益字大光紹興初參知政事然則旦有二子惟益附見奎不可考矣

元豐大觀詔書後序

正書

碑序前列銜宣德郎權發遣提舉京東西路學事借緋魚袋臣程振撰文云政和三年四月有詔許以元豐大觀詔書揭諸省臺寺監監司守令治事之所以戒內外小大之臣各恭乃職毋相口紊於是臣孝純臣純誠旣承命卽所司中門之東大書深刻藏以層構云末又題臣振實書之以申勸來者最末另行結銜朝議大夫權京東路轉運判官張孝純朝議大夫京東路計度轉運使兼勸農使借紫金魚袋臣沈純誠宋史程振列傳徽宗幸學以諸生右



職除官為辟雍錄升博士遷太常博士提舉京東西路學  
 孝純見欽宗紀靖康元年三月知太原張孝純為資政殿  
 太學士純誠見河渠志大觀三年八月詔沈純誠開撩菟  
 源河免源是也却掃編舊制借服不佩魚故繫銜止稱借  
 紫借緋政和中王詔延康始建請借服皆佩魚如賜者從  
 之然差勅止仍舊云可特差某職任仍借緋或借紫而已  
 而其後繫銜者多自稱借紫金魚袋若借緋魚袋然終無  
 所據也以碑証之程振借緋而魚袋沈純誠借紫而金魚  
 袋並於政和三年時繫銜如此益信敦立掌故之徵為實  
 張戴等題名

右題名正書在密縣文云留守薛公以右丞召還通判

戴邢僚戶曹李敏能刑掾趙子泰送行至超化寺政和二

年閏四月初九日薛公謂薛昂也宋史本傳出知江寧徙

河南久之提舉嵩山崇福宮政和三年蔡京復用事昂復

自尚書右丞為左丞徽宗紀政和三年夏四月己酉以此資政殿學士薛昂為尚書右丞此

題稱留守當為徙河南時也若徐處仁傳云以疾奉祠歸

南都方臘為亂處仁亟見留守薛昂為畫戰守之策是昂

前在南都所稱非此時矣又提舉崇福宮故得取道于密

而至超化寺一時情事猶可推見如此邢僚為邢恕子附

見恕本傳惟云及恕在時為司農丞其為河南通判未之

及也

宗城縣新學記

行書政和三年四月

碑記云北都畿邑十三宗城舊治雒川避河之衝崇寧四年始遷邵固雖隸屬大名而絕邇甘陵不過三十里學校之興縣之吏遵用崇寧二年詔書肇造宏麗以深邃爲他縣最縣在雒川村時有學元祐七年令郭長卿闢而新之今丞相何公實爲之記通直郎牛直侯洵仲爲是邑之二年以學雖已遷亦猶宗城之舊祈秦坦載其興廢之由坦後題銜文林郎充恩州學教授陽翟者是也記云今丞相何公何執中也直侯題銜通直郎知大明府宗城縣管勾勸農公事專切管勾學事教閱保甲某書并篆額宋史徽宗紀崇寧四年九月詔京畿三路保甲並於農隙時教閱但以縣令教閱保甲帶銜史未之及文獻通考載紹興九年知建昌軍朱長民奏宣和以前准知通令佐階銜帶主管學事今題銜管勾學事是也書最峭健筆勢尤與東坡相近

### 陳彪題名

右題名行書文云左武大夫忠州團練使知東上閤門事提舉中太一宮兼祐神觀公事王郅子堅右武郎提點醴泉觀使陳彪炳文忠訓郎王淵深甫因隨侍見權節使太尉詣崇福得獲恭叅啓母殿下遂觀聖跡不勝大怖時政和戊戌孟夏十有八日彪謹題捧硯人劉天錫後又有小字正書題政和八年端午日靜正法師視朝散大夫知西京嵩山崇福宮事張若口太上都宮法籙弟子知廟事曹

如口節使太尉宋史徽宗紀政和七年春正月庚子以殿  
 前都指揮使高俅為太尉職官志自崇寧五年司空左僕  
 射蔡京為開府儀同三司安遠軍節度使中太乙宮使其  
 後殿帥則有高俅然則此題所稱節使太尉必高俅也居  
錄載高俅出身不次遷此題視朝散大夫志又云宣和以  
拜數年間持節至使相後官卑而職高者謂之視故有庶官視從官視執政執政  
 視宰相凡道官亦視文階云此當政和時道流亦視品官  
 蓋不在宣和以後至紀載重和元年詔視中大夫林靈素  
 視中奉大夫張虛白並特授本品真官則更授之正階正  
 員益以猥濫矣

趙德甫題名

右題名在泰山磨崖之東側正書文云天水趙明誠德甫  
 政和三年閏月江秬香拓贈案金石錄後序云余建中辛  
 巳始歸趙氏時先君作禮部員外郎丞相時吏部侍郎侯  
 年二十一在太學作學生後二年出仕宦又屏居鄉里十  
 年攷建中辛巳是為徽宗建中靖國元年德甫年二十一  
 至政和三年癸巳則三十有三矣此正屏居鄉里十年時  
 也

勅賜神居洞崇道廟額碑記

宣和元年三月

記載平陽府奏本府臨汾縣姑射山姑射洞離洞二十五  
 里有廟名姑射神人廟乞特賜名額奉勅賜姑射洞為神  
 居姑射神人廟為崇道其依牒奉行在政和八年閏九月

宋史地理志平陽府望平陽郡建雄軍節度本晉州政和六年升為府此記以平陽為府是也後列中大夫守右丞范中大夫守左丞馮徽宗紀重和元年以翰林學士承旨馮熙載為尚書左丞刑部尚書范致虛為尚書右丞又列少宰少保太師魯國公証之宰輔表余深自少宰加少保而太師魯國公則蔡京也後列宣和元年三月二十一日承務郎知臨汾縣事王伸立石朝奉郎知臨汾縣丞趙不鈞書

豐澤廟勅牒并記 宣和元年三月在濬縣

碑上載勅文行書有政和八年閏九月八日字後細書列有名銜拓本濕暈不可辨後行書奉勅如右牒到奉行政和八年閏九月九日後載銜名太師魯國公京下注免書二字左輔下注一闕字門下侍郎時中閏九月十日申時都事李口冲右司員外郎權口口付吏太師魯國公京免書太宰下注闕字少宰下有花押尚書左丞熙載尚書右丞致虛後鈐尚書吏部告印印上書一押字後列典事李敏員外郎口應書令史白宗禮名最後於印上書政和八年閏九月十三日下宋時勅牒下行其式如是前門下侍郎時中宰輔表九月庚寅白時中自中書侍郎遷門下侍郎是也又左輔下注闕字徽宗紀改侍中為左輔意此記下勅之日左輔適闕人故不著也與太宰下注闕字表稱七月鄭居中自太宰加少傅九月辛丑鄭居中罷起復蓋

授堂金石文字續編卷十一

於時閏月官猶未備人也少宰下書押字則表所書余深  
自少宰加少保也下方記徐公禱雨得應抗章請賜封號  
於是神錫爵康顯侯上列勅文卽謂此事其後題奉議郎  
充濬州州學教授黃翰記并書奉議郎知濬州黎陽縣事  
王兆立石後有朝請大夫通判濬州軍州同管勾神霄玉  
清萬壽宮管勾學事謝朝請大夫通判濬州軍州管勾神  
霄玉清萬壽宮管勾學事徐中奉大夫提舉三山天成橋  
河等事賜紫金魚袋孟拱衛大夫永州防禦使直睿思殿  
提舉三山天成橋河等事王四人皆姓而不名徽宗紀政  
和六年改天寧萬壽觀爲神霄玉清萬壽宮此記所稱管  
勾正與史合而禮志亦云政和六年詔措置宮觀如萬壽

醴泉近百員更不立額故此以一宮而管勾者二人則豈  
非濫也又志於宮觀不著管勾之名但有提舉提點及主  
管三職意者管勾卽主管之謂後因避諱易之與河渠志  
孟昌齡子揚揆俱監修三山天成橋而昌齡在宣和元年  
官已崇矣此稱中奉大夫者或爲其子揚與揆未可知也  
志言靖康元年詔揚揆與中奉大夫當因舊官復之

左山興化禪院普同塔記

行書宣和二年四月

普同塔記濟陰山人石芳撰并書其文云西堂管內僧正  
寶印大師賜紫茂基嘗建斯塔茂基俗姓江氏元符二年  
蒙天恩落髮受具戒崇寧元年皇弟定王奏賜紫方袍嗣  
領院事

云

案皇弟定王是爲神宗第十二子偲見宋史

徽宗紀即位未改元之二月進封睦王德為定王是也石芳書深有東坡遺意宋佳刻也

邢恕題名

右題名正書字大三寸自左起不著年號惟書二月六日來觀邢恕和叔題上微偏有題云原武邢儔朝謁神霄像罷過天封得先公題字壁間不勝孺慕三川王堯文同遊宣和癸卯八月朔案儔云得先公題字即謂恕也恕見宋史姦臣傳子居實儔居實有異材早卒儔及恕在時為司農丞靖康初坐以始禍削籍大金國志趙倫燕人狡詐懼邢儔儔遂以聞不得歸乃伴詐以情告伴使史謂首禍指此不見有儔名攷齊東野語蔡京在相位日權勢甚盛內外官私公移皆避其名如京東京西並改

畿左畿右之類又蔡經國聞京聞音稱京為經乃奏乞改名純臣竊意當時儔亦狗眾邀媚而易名曰儔迨京既敗乃復初耳然則儔之佞回幾及千年不能掩覆其跡如此予故著之以有諷也儔既自署原武宋史載恕鄭州陽武人陽武不屬鄭州當依此題原武為正

改修孟州門頌詔廳碑正書宣和六年三月在孟縣

碑分三層上層宣和御筆並依所奏施行六字中層載元紹直狀奏移修門廳始末文多漫漶不屬惟云臣伏觀微猷閣直學士正奉大夫王序前過河陽又云安撫使王序下層載紹直跋記尚可辨識略云宣和五年冬十二月癸卯臣以孟州頌詔廳改建具其事上達粵十八日有旨賜

可臣恭奉宸翰即日命工更改又六十日而成有司礱石  
有請曰凡郡之奏疏被上之親筆而下者皆刻之金石以  
垂示天下口敬承故事臣謹按口三城在河之陽控扼諸  
道襟帶河山故自列朝號爲巨屏先後來者皆名公卿  
云末題中散大夫權知河陽軍州口管勾神霄玉清萬壽  
宮兼管內勸農使口口口提舉黃河埽岸口口口馬事  
河南縣開國男食邑三百戶借紫金魚袋臣元紹直謹記  
却掃編凡曰節鎮皆曰某軍某軍而孟州曰河陽三城襄  
陽府曰山南太原府曰河東鳳翔府曰鳳翔揚州曰淮南  
江陵府曰荆南成都府曰劍南西川潼川府曰劍南東川  
興元府曰山南西道總九州府獨因舊以爲名亦出於舊

然本不以地望有所輕重然凡建節者反以是數州爲重  
非親王尊屬與勳望重臣莫或得之故記以三城列朝號  
爲巨屏者此也紹直史無所徵然修舉廢墜不事因循遠  
於庸猥者多矣序附見兄庠傳內云序宣和間以恩倖至  
徽猷閣直學士是也亦見河渠志政和七年九月丁未詔  
楊專一措置而令河陽守臣王序營辦錢糧督其工料此  
後載前河陽守臣正與相符

西嶽題名

右題名殘缺今文字可紀者有云二十三日自知永興軍  
府事奉詔乘傳歸闕將長子太子中舍益恭右侍禁益昌  
長孫太常寺奉口郎慎言祗謁靈宇案此當爲王曙所記

也宋史列傳曙徙河南府永興軍召為御史中丞兼理檢使與題名知永興軍府合奉詔歸闕即召為御史中丞也傳惟言曙子益恭益柔恭字達夫以蔭為衛尉寺丞終父喪遂以尚書司門外郎致仕題名云長子益恭者即其人而益昌亦為其子史因以其微無可紀也長孫慎言邵氏聞見前錄載曙孫慎言慎行慎術俱列大夫皆賢從康節先生交遊又著英會亦列朝議大夫王慎言名

杜詵等題名

右題名行書無年月自左起文云奉禮郎杜詵光祿主簿蘇舜欽將作主簿司馬旦京兆掌書記趙訥京兆戶曹張復太廟缺詵見歐陽集杜祁公墓誌銘云子男曰詵大誼許事當即其人宋史列傳稱舜欽以父任補太廟東都事略復舉進士稍遷大理寺丞不及其為光祿寺主簿司馬旦傳歷官十七遷至大中大夫不言為將作主簿蓋史略也又大中大夫史亦涉誤証以夏禹祠題名云先太中河內公正指伯康則宜從太為是

游師雄墓誌銘 正書

墓誌首列朝請郎直秘閣知潭州軍州兼管內勸農事兼荆湖南路安撫充本路兵馬鈐轄驍騎尉賜紫金魚袋張舜民撰朝散大夫直龍圖閣權知秦州軍州兼管內勸農事兼權發遣秦鳳路經略安撫使兼馬步軍都總管公事



騎都尉賜紫金魚袋邵鯁書端明殿學士中散大夫充涇  
原路經略安撫使馬步軍都總管兼知渭州軍州事管內  
勸農使上柱國賜紫金魚袋章燾篆蓋舜民與燾宋史並  
有傳而敘舜民不載其兼官敘燾不載其歷階又誌文載  
師雄陞潁州團練推官陞忠武節度推官改宣德郎遷奉  
議郎賜緋遷承議郎加武騎尉改工部員外郎知秦州兼  
權秦鳳路經略安撫使兼馬步軍都總管加飛騎尉傳皆  
未之及叔卿幹略爲當時所倚而未竟其材傳旣約用此  
志爲文不宜敘其歷官過簡使益有失實之憾也予爲補  
之如此

無盡藏岩跋

正書

跋刻爲衡陽羅當世用之所撰書其文云臨武縣南十有  
五里之外有巖焉溪山美麗竇穴明澈誠一邑山水之巨  
擘舊名奔頭邑宰王公易爲秀巖寶慶丁亥中春武夷趙  
公率僚屬勞農于郊因過是岩指點勝槩拂拭舊題顧謂  
衆曰以秀命名美則美矣恐未足以盡其實欲以無盡藏  
名之可乎于是遂書諸石宋史地理志桂陽軍南渡後增  
縣一臨武中有石晉廢紹興十年復此跋所記是也有字  
下當有脫文此條宜移在淳熙後蓋上版誤

封靈峻昭應博濟永利公勅

行書乾道戊子季春

石刻上層鐫勅文署乾道二年十月五日後題尚書左僕  
射平章事口尚書右僕射同中書門下平章事杞叅知政

事芾同知樞密院兼權叅知政事俊卿以宰相表攷之爲  
葉口魏杞蔣芾陳俊卿也四人皆名而不氏後列右承議  
充秘閣修撰前四川安撫制置使同叅口口兼提舉四川  
綱馬口路舟船驛程賜紫金魚袋吳口立石名已殘蝕不  
可辨四川之名由咸平四年三月辛巳分川峽轉運使爲  
盜利梓夔四路後乃相沿謂四川矣

見宋史  
真宗紀

儀制令石刻

淳熙  
八年

石刻在略陽中行題儀制令三大字徑三寸餘下題字寸  
餘文云賤避貴少避長輕避重去避來後題淳熙辛丑邑  
令王口立石而名損缺不可見辛丑度宗之八年也東都  
事略太宗紀太平興國八年正月甲申詔曰傳云能以禮

讓爲國乎何有宜令開封府及諸州於衝要處設榜刻  
制令論如律宋史孔承恭傳嘗上疏請令州縣長吏詢訪  
耆老求知民間疾苦吏治得失及舉令賤避貴少避長輕  
避重去避來請詔京兆並諸州於要害處設木牌刻其字  
違者論如律上皆爲行之然則此令爲宋律舊文起於上  
旨榜之要衢固當宋初已有此制然當時未刻於石也癸  
辛雜誌載律云去避來之文太宗嘗問孔承恭曰令文宗  
貴賤長輕各有相避何必又云去避來此義安在承恭曰  
此必戒於去來者互相避耳蓋承恭又承上問爲申律意  
如此但如宗貴賤長輕於義不相屬皆傳刻脫訛之過非  
周氏故書也此刻得之趙渭川及他宋刻善本足爲關中

金石記補遺予故喜而跋之

文丞相題琴背詩 行書

琴背題詩藏福建口縣何氏家大興朱先生拓兩紙予得其一云松風一榻雨瀟瀟萬里封疆不寂寥獨坐瑤琴遣世慮君恩猶恐壯懷消時景炎元年蒙恩遣問召入夜宿青原寺感懷之作譜於琴中識之末題文山二字按指南前後錄及別錄並未載此詩攷宋史少帝紀德祐二年五月乙未朔宜中等乃立昱於福州以為宋主改元景炎文天祥自鎮江亡歸庚辰以為右丞相兼知樞密院事文山本傳汎海至温州聞益王未立乃上表勸進以觀文殿學士侍讀召至福拜右丞相紀年錄四月八日至温州五月朔景炎皇帝於福安登極改元以觀文殿學士侍讀召赴行在今題稱蒙恩遣問召入正其時也丞相身柱宋社瀕危彌厲得此詩益足以想見所懷

偽齊

孟邦雄墓誌銘


孟邦雄誌石前已跋尾在偃師金石遺文記內後覽熊克中興小紀云紹興二年夏四月時劉豫欲遷居東京而忠護軍翟興屯伊陽山以阻其路豫每遣人往陝西則假道于金由懷衛太行取蒲津濟河以達誌所指西京北路安撫總管翟興阻兵負險隔絕道路即其事也誌又載正月西賊叛逆順商號三州相繼變亂虜掠百姓攻圍城邑大

兵未集遽入西洛按中興小紀知虢州董震初嘗從僞至是復歸正乃將所部與琮并力襲取西京大金國志天會十一年春西京留守孟邦雄爲宋翟琮所敗琮卽翟與子時爲河南鎮撫憤大金發掘陵寢琮及董震以小寨餘衆入潼關邦雄醉方卧俘其族以去潼關字疑誤然則西賊謂董震也震知虢州在洛陽之西故也又翟琮引衆擣孟邦雄營邦雄方醉臥遂將其族以歸與誌載被執相符而誌旣云邦雄被害又父恩被傷致殞男安世同日被禍則俱戮死于西京故邦雄得葬永安軍蘇村之原也而熊氏謂詔琮押邦雄赴行在當日蓋未成行矣陳振孫書錄解題以熊克爲是書往往疎畧多抵牾其有指于此也與

華裔圖

華裔圖碑阜昌七年十月朔岐學上石其略云四方蕃夷之地賈魏公圖所載凡數百國今取其著聞者存之又參攷傳記以敘其盛衰本末蓋撰者自著其例如是所云魏公謂賈耽也舊唐書本傳耽令工人畫海內華夷圖一軸廣三丈縱三丈三尺率以一寸折成百里今此圖所載皆宋制京府州軍之名取賈舊製變爲縮本最易展閱閣伯詩著潛邱劄記地圖見者元道士朱思本輿圖蓋其平生之志而十年之力不知此圖又前于元矣伯詩引新唐書謂以寸爲百里表獻于上曰縮四極于織縞分百郡于作績宇宙雖廣舒之不盈庭舟車所通覽之咸在目此表載

舊唐書耽本傳今誤連于新書下伯詩必不疎莽至此校錄者誤也偽齊僭立亦有四京之目此圖稱河南不言西京或由翟琮復西京已不屬之偽齊與



授堂金石文字續跋卷十一終

受業臺州何星衢校

授堂金石文字續跋卷十二

偃師武億虛谷著 男穆淳編 孫素重校刊

遼太子左衛率府率李內貞墓誌

保寧十年

碑誌為太谷孟君澔所得在今京師琉璃窖廠既封其墓

屬大興朱先生更為文記之予丙午歲視此石已漫剝不

可讀後得朱先生記云隴西李公諱內貞字吉美媯汭人

後唐莊宗時舉秀才除授將仕郎試秘書省校書郎守雁

門縣主簿次授儒林郎試大理寺守媯州懷來縣丞亂後

歸遼太祖一見器之加朝散大夫檢校工部尚書兼御史

中丞賜紫金魚袋兼屬珊都提舉使太宗初改銀青崇祿

大夫檢校尚書右僕射故燕京留守南面行營都統燕王

牒蠟以公才識俱深委寄權要補充隨使左都押衙中門使兼知廳勾次授薊州刺史次授銀冶都監景宗改檢校司空兼御史大夫上柱國次行太子左衛率府保寧十年六月一日薨于盧龍坊私第享年八十其年八月八日葬于京東燕下鄉海王村予以李君歷官考之遼史百官志初加朝散大夫改銀青崇祿大夫階也上柱國勳也志皆無文又兼屬珊都提舉使者志于北面內載珊軍詳穩司應天皇太后置軍二十萬選番漢精兵珍美如珊瑚故名而都統所屬有隨使左都押衙中門使兼知廳勾由都統委授南面財賦官右銀冶都監志皆不及之非得此誌則奚所補焉牒蠟見遼二臣傳爲行營都統志稱行軍都統亦異文也稱崇祿大夫不言光祿者避太宗諱也

景州陳宮山觀鷄寺碑

正書太安九年九月在豐潤縣

碑前列燕京右街天王寺講經律論前校勘法師沙門志延撰并書兼篆額文去案幽州土地記薊城三百里陳宮山有觀鷄寺俗傳說會觀山峰有金鷄之瑞因以名焉載考初修不詳何代予以水經注証之巨梁水出土垠縣北陳宮山西南流逕觀鷄山謂之觀鷄水水東有觀鷄寺寺有大堂甚高廣可容千僧鄴氏當元魏時此寺已見于注蓋所起遠矣又云北依遵化城實前古養馬之監南隣承濟院乃我朝煮鹽之場遼史地里志景州本薊州遵化縣遵化縣本唐平州買馬監爲縣來屬依碑當作養馬監而

永濟院之煮鹽食貨志亦不著其名亦當補史缺也文內  
真寂之鄉真字缺點避與宗諱是碑與乾統二年涿州雲  
居寺碑及金智度寺邑人供塔碑銘雲居寺重修舍利塔  
碑豐潤大天宮寺碑元涿州無住禪師碑元應張真人道  
行碑歷代名賢碑朱竹垞曰下舊聞皆未收入故并識於  
此

觀音菩薩地宮舍利函記

正書在京師法源寺

京師南城西偏唐大憫忠寺今易名法源寺遼藏舍利函  
石記存焉舊為院墻脚支窀方石錢少詹事始屬寺僧另  
移置之今按後照有太安十年歲次甲戌閏四月辛未朔  
二十二日甲時此君跋云予頃遊馬鞍山戒壇寺見遼

士王鼎撰法均禪師碑後題乾時又石幢二皆遼時刻一  
題庚時一題坤時潭柘寺有了公禪師塔銘金大定中刻  
亦題庚時今此記稱甲時蓋金遼金石刻之文多作斯語  
以甲乙丙丁庚辛壬癸乾坤艮巽代十二支也愚謂此陰  
陽拘忌之說其傳已久顧亭林嘗謂歷家天盤二十四時  
有艮巽坤乾不知其所始因按之淮南子天文訓子午卯  
酉為二繩丑寅辰巳未申戌亥為四鈎東北為報德之維  
西南為背陽之維東南為常羊之維西北為躡通之維此  
四維即艮巽坤乾後人省文取卦名當之其說詳矣然以  
卦名汶易亦未實指其故攷舊唐書呂才傳若依墓書多  
用乾艮二時並是近夜半呂才在唐之初所序墓書已云

然蓋術士竄易為之也又宋天禧四年送奉神迹碑石題名有云四月二十七日已後午前丙時豎立訖唐潘智昭

墓誌後題天寶七載七月五日景時北齊書南陽王綽傳以五月五日景時生

至午時後王乃生然則金石刻之文不獨遼金為然矣

雲居寺供塔燈邑碑行書乾統十年九月在涿州

碑前列崇教寺沙門行鮮撰後列陽嶼沙門圓融書其文載舍利始於西來高僧出之臂間後有百法上人得之寺僧大德文密與眾謀議化錢建塔一座燈邑高文用等誓志每歲上元廣設燈燭環於塔上三夜不息遼之遺俗侈於佛事此其一也燈邑即近人稱燈社爾他無足紀者圓融書勢深似李北海遼刻佳本可寶也

金

智度寺邑人供塔碑銘正書天會十年六月在涿州

碑載涿州城東北隅智度寺中有塔為如來具體之一郡人周承逸楊遵式倡眾興供佛塔當四月八日如來降生之辰其事最侈陳因以刻石前列鄉人將仕郎試大理評事李端謀撰同泰寺沙門法譚書後列邑長彰信軍節度使金紫崇祿大夫檢校太保知涿州軍州事清河縣開國子食邑五百戶張元徵中散大夫起居郎同知涿州軍州事都騎尉東陽縣開國男食邑三百戶賜紫金魚袋寧獬涿州軍事判官文林郎試秘書省校書郎張綱按元徵見金史張汝弼傳云父元徵彰信軍節度使元素之兄也此



碑所署銜與史合惟崇祿大夫不載百官志攷遼史百官志崇祿寺避太宗諱光改階光祿大夫者皆易崇祿意金之初尙襲其制未及釐正也與寧獬階中散大夫志稱中散爲內侍之階天德創制今加于文職事官大金國志五品謂文臣中散大夫至朝列大夫是其徵也都騎尉及秘書省皆與志騎都尉秘書監不符都騎尉或上石者倒訛又省監亦可互稱故云然

定光禪師塔銘

正書皇統二年十月在長清

右碑濮陽李魯撰濟南高鯉書儒林郎行臺大理寺丞韓全篆額行臺之制以別于中臺天眷三年移置汴京皇統二年定行臺官品皆下中臺一等然則此題大理寺丞隆

于正六品故書階儒林郎僅依從七品之下此皇統新制也後立石者結銜起復昭武大將軍陝西諸路轉運使劉益百官志轉運陝西有東西路案地里志天德二年京兆府置陝西東路轉運司平涼府置陝西西路轉運司此當皇統二年陝西轉運猶未分東西路也因言諸路以舉之與定光俗姓周揚州天長義城人皇統元年住靈巖明年化去銘依昌黎韓洵通仕所敘行狀侈言茶毗種種之異幻銘僧徒者諛詞之常如是

普照寺碑

正書皇統四年十月在沂州府

碑斷裂書換人名氏僅有汝尙二字存按之齊乘所載爲中陶仲汝尙也于氏去金未遠其載此碑猶全具然亦約

舉其文云當子城西南有古臺臺西有廢池耆舊相傳臺曰曬書池曰澤筆東晉王右軍故宅也往歲得斷碑于土中謂招提復興于後魏唐賜額開元宋崇寧初詔改爲天寧萬壽禪寺逮廢齊居攝專用苛政理國知衆不附尤狹中多忌凡浮屠老子之居一切廢革遂易天寧爲普照云今以碑証之皆與相符後題銜奉國上將軍行沂州防禦使事兼管內按撫使統押沂海路萬戶兵馬高召和召和卽與覺海復葺此寺者也金史廢帝紀正隆三年十二月乙卯以樞密副使張暉爲尙書右丞歸德尹致仕高召和式起爲樞密副使又高彪傳彪本名召和失辰州渤海人爲武寧軍節度使頗黷貨嘗坐贓海陵以其勲舊杖而罷之改忻州防禦使以碑証之當作沂傳刻悞也其階奉國上將軍及兼官傳皆略不書宜以此碑補之又名召和不作召和式似式與失爲譯音之衍

張汝爲題靈巖寺記

行書正隆元年四月在長清

右碑記云余素好林泉久聞靈巖名山所慊塵緣未獲游覽比雖守官汶上亦無由一到茲因被檄賞勞徐宿邳州屯守軍兵還登岱宗故不憚迂遠惠然而來周覽上方勝概時正隆丙子歲仲夏初七日同知東平總尹遼陽張汝爲仲宣題金史張浩傳子汝爲卽其人也然史未著其官中州集汝爲字仲宣河北東路轉運使亦不錄同知東平總尹皆當依碑補著之總尹者地里志東平府以府尹兼

總管故并截二官名為一與

宗城縣新修宣聖廟記 正書正隆三年四月

記前列資政大夫太常卿清河郡開國侯傅慎微撰仙巖  
翟炳書并題額炳見寶公禪師塔銘稱相州林慮縣仙岩  
梅軒居士翟炳者即其人也其文序正隆元年歸化高元  
來為縣簿勸誘邑中業儒者魏選等廿餘人詣漕司請邑  
東南隅故郵驛肇建新學落成刻石于堂記引論語先進  
於禮樂因釋云孔子所謂先進者堯舜禹湯文武周公之  
時仕進者也所謂後進者孔子之時仕進者也先進之于  
禮樂井田野之人教之後進之於禮樂止教好善君子而  
已亦本孔氏先進後進謂仕先後輩之解 包氏亦云謂仕也 而更

肆其說錄之以見當時學所尚如此

雲居寺重修舍利塔碑 正書正隆五年七月在涿州

碑前題朝列大夫前行代州五臺縣令騎都尉賜紫金魚  
袋李構撰無書人姓名其序藏舍利事當重熙中有郡守  
侍中劉公六符與寺僧可信藏俊智通文密等相謀踵興  
至大安八年屢有修建其餘夸飾之詞不足錄也後序中  
都寶塔寺前三學律主傳妙大德知殊初由本科試中于  
有司特補崇議大德領前件職大金國志記浮圖之教不  
載僧職皆由試受輒為舉此補逸六符遼史有傳重熙初  
遷政事舍人擢翰林學士十一年使宋還為漢人行宮副  
部署又加同中書門下平章事出為長寧軍節度使俄召

爲三司使其于爲涿州郡守侍中未及也

彼岸院勅牒

在博山縣後峪村

彼岸院勅牒石刻今存寺內龕置前院之西墻孫文定公顏山雜記所云金世宗大定四年勅建有尙書禮部牒文刻石院中餘文剝蝕不可辨讀者此也予就其側諦視之上層刻尙書禮部牒奉勅彼岸院下有押字另行正書大定二年十二月中鈐一方印又後列銜四人中憲大夫行員外郎李宣威將軍郎中耶律皆氏而不名又侍郎下無氏又末行筆畫重疊紐結成文半已殘蝕無從推論惟一王字下注押字金史百官志禮部尙書一員侍郎一員郎中一員員外郎一員此題四人與官制符其末書王字者

當爲部尙書王競也文階正五品中曰中憲大夫而員外

郎從六品凡散官高於職事者帶行字此牒中憲大夫行員外郎可按也宣威將軍在武階正五品之中而帶於文

職事官文武階蓋金制通用如此然攷金世寺額下頒多

鬻於官食貨志大定五年上謂宰臣曰頃以邊事未定財

用闕乏自東南兩京外

命

進納補官及賣僧道尼女冠度

牒紫褐衣師號寺觀名額今邊鄙已寧其悉罷之此牒當

大定二年時猶未停此制彼岸之額始亦出於納財得之

也下刻記文題守法沙門沖口撰又題淄川段當是書石

者惜名已缺記文略可屬句村曰掩底寺曰彼岸大唐沼

法師所建十大寺中之一於是知寺固肇於唐非金世宗

創置矣村曰掩底今土人作掩的案的誤音爲滴金時寢殿小底諸名近僕沿此自稱小的亦猶是也已又有稱武略將軍武功將軍徵諸史志武階從六品下曰武略將軍而不見有武功及檢大金國志亦無聞焉於是又知此記足補遺制所未備也

大天宮寺碑記

正書大定十二年十二月在豐潤縣

記前題朝列大夫充德州防禦同知天水縣開國男食邑三百戶賜紫金魚袋趙攄撰中州集狀元內有趙內翰攄字子充宛平人自號聯全道人亦見大金集禮大定二十二年以中岳西岳北岳重修廟宇學命待制黃久約修撰趙攄應奉黨懷英定撰各廟碑者是也又題尙書令文成

奉郎任詢書中州集詢字君謨易州軍市人正隆二年進士歷省掾太名總幕益都都司判官北京鹽使課殿降泰州節廳此云尙書令史卽爲省掾也又稱詢書法爲當時第一觀碑之用筆與顏平原無異遺山所許不誣也朝奉大夫充永濟鹽副使騎都尉東平縣開國男食邑三百戶賜紫金魚袋呂溥題額後題中靖大夫北京留守判官上騎都尉博陵縣開國子食邑五百戶賜紫金魚袋崔擴仁奉國上將軍永濟鹽使護軍天水郡開國侯食邑一千戶食實封一百戶趙敬昌同建按記所稱玉田縣永濟務大天宮寺豐潤縣志約載碑文云寺在城西南遼清寧元年鹽監張日成建有塔一十三級初名南塔院壽昌三年賜

額極樂院至金人與宋修好行府悉寓于此天會五年勅加大天宮寺惟前云寺在城西南卽碑稱在務之西南也金史地理志永濟縣大定二十七年以永濟務置未詳何年廢攷元孫慶瑜豐閏縣記在昔金大定間始改務爲縣至大定初避東海郡侯諱更名曰豐閏讀史方輿紀要玉田縣之永濟務金泰和中置豐潤縣屬薊州是永濟縣改名豐閏非廢而不置也寺由張日成建而塔則其嗣從宜於清寧八年所置縣志併爲一事書之又乾統五年改極樂院爲天宮寺亦脫記皆非也碑稱國朝故事凡寺名皆請於有司給授勅額其異恩者特加大字以冠之食貨志大定五年始罷賣寺觀名額故前此請授以爲故事也異恩特加大字可補史所未及

大明禪院記

正書大定十六年九月

予館清化日爲訪碑之遊於今月山寺得金元石刻凡數種此記爲釋自覺述妙先書在寶光寺西偏山半巖菴中上鐫賜大明禪院牒記大定二年幸遇皇王賜額於清風谷內修一所精藍大小屋舍一百餘間一十四年功將了畢者案大定二年壬午至丙申實十有四年于時僧徒之所營築侈且遠矣記未書懷州清化鎮刊石人張鏞懷州初以與臨潢府懷州同改南懷州天德三年去南字仍爲懷州今碑止名懷州是也清化稱鎮元豐九域志旣未錄入惟金史地理志載河內鎮四武德栢鄉萬善清化証之此碑或當元豐後已有此名金遂沿而不易也與元栢元真人門

衆碑河內有栢香鎮史以香作鄉非是或因薊脫上截爾

又此碑少北佛座橫勒大金正隆三年歲次戊寅九月二十七日游山至此修菴三間至大定二年歲在壬午二月初七興工至是歲五月十一

日功畢下書清風菴壽禪師記

濟源縣創建石橋記 八分書大定二十一年三月在濟源

記言濟源居太行之陽澗水自西北來稍折而東因高走下湍流悍急縣治適當其衝浸淫衍溢齧城隅激石瀨至于東門之下高岸陡落幾及數尋廣狹三倍之舊嘗架木爲梁每夏秋大雨則暴漲衝射屢易屢敗大定十五年春淇水夏公禔來宰是邑因衆請易新是橋乃攻山石用圖大長久蓋經始於十七年十月而告成二十年二月後列進士王藏器記并篆額史仲尹書文字皆中古法金石刻佳本也

重修中嶽廟碑 正書大定二十二年十月在登封縣嶽廟

碑載中憲大夫充翰林待制同知制誥上騎都尉江夏縣開國子食邑八百戶賜紫金魚袋黃久約奉勅撰奉政大夫充翰林修撰同知制誥兼國史院編修官驍騎尉賜緋魚袋郝口書承直郎應奉翰林文字同知制誥兼國史院編修官雲騎尉賜緋魚袋党懷英篆額其述大定二十二年十月庚申以重修中嶽廟成制詔臣久約書其事於石先是十二年秋九月勅諭宰相諸嶽廟久闕修治宜加增飾其選使馳傳遍詣檢視以聞明年使者復命粵十月壬

午乃有重修之命蓋始事于十六年四月丁未訖于十八年六月戊子按金史世宗紀及禮志黃久約於修廟撰文皆未書惟大金集禮大定二十二年十月九日又以中嶽西嶽北嶽重修廟宇畢命待制黃久約修撰趙攄應奉黨懷英撰各廟碑文今此碑稱久約奉勅是其一也

靈巖寺開堂疏

正書大定二十三年九月在長清

右疏前列左平章政事今諸滌公長老住持濟南府十方靈巖禪寺為國焚修開堂演法祝延聖壽者次列疏文末題大定二十三年九月空日不書中鈐平章政事印最後題金紫光祿大夫平章政事宗國公蒲察通名案金史世宗紀大定二十一年三月尚書左丞蒲察通為平章政事

二十三年十一月丙寅平章政事蒲察通罷据此疏左平章政事即左丞也通居此官為宰相之貳故當時亦云左平章政事矣始請滌公在二十三年三月之前及疏文立石實為二十三年故前云左平章政事後書平章政事官序可案如此通本傳大定十七年拜尚書右丞轉左丞閱三歲進平章政事封任國公百官志封號小國三十內有萊云舊為宗以避諱改据是則通封宗國其後當避睿宗諱易號任國史本此書之耳

重修汝州香山觀音禪院記

正書大定二十五年在寶豐香山寺

碑前列中奉大夫南京都轉運使上護軍太原郡開國侯食邑一千戶食實封一百戶口克口命子師儉書并篆額



文稱河南汝州之境嵩山之下汝南三十里有佛刹焉在  
乎山之巔曰香山院又稱大定二十四年春天子東幸口  
國以唐國主婿大興府尹駙馬都尉奉國上將軍烏林答  
天錫移授河南路統軍使金史世宗紀大定二十四年三  
月壬寅如上京皇太子允恭守國碑所指天子東幸謂此  
也天錫以世戚之重移授統軍益於鎮攝封陞實為要職  
然天錫在史無傳僅附名烏林答暉傳後云暉遷都點檢  
兼侍衛親軍副都指揮使卒詔以暉第三子天錫世襲納  
鄰河猛安親管謀克惟舉其世職書之其後歷官之重竟  
不能詳今參以碑所題銜實由大興府尹任河南路統軍  
使勲上護軍爵廣平郡開國侯食邑一千戶食實封壹伯

戶又天錫尚唐國公主例當特書而史亦脫佚良以金季  
之亂典文失徵無所採據之故也齊東野語女真使烏林答天錫到闕要上降場  
問金主起居據是則天錫又充使職而史亦未及師儉書殊逸宕有奇致金刻佳  
本無踰此矣

重修文宣王廟記

正書大定二十七年元日在涿州

范陽舊有夫子廟在城東南貞元五年盧龍節度劉公所  
建遼統和中始移置于此大定二十三年冬汾陽郭侯預  
自尚書郎出殿是邦周覽庭宇憫其敝陋與僚顯武將軍  
梁倣先共謀斯舉起二十五年夏四月二十日癸丑訖五  
月八日庚寅前列銜少中大夫左諫議大夫兼尚書禮部  
侍郎翰林直學士知制誥上輕車都尉江夏郡開國伯食

邑七百戶賜紫金魚袋黃久約撰承德郎充翰林修同知  
制誥兼修起居注國史院編修官飛騎尉賜緋魚袋党懷  
英篆額後列西溪李嗣周書不與撰文篆額同名位懸殊  
故也立石者少中大夫行涿州刺史兼知軍事提點山陵  
輕車都尉太原郡開國伯食邑七百戶郭預金史世宗紀  
大定八年十月以涿州刺史兼提點山陵與郭預題銜合  
顯武將軍涿州倉都監兼軍資庫事騎都尉安定縣開國  
男食邑三百戶梁微先黃久約傳略其階勲及爵懷英傳  
亦失載階勲與充翰林修撰兼修起居注官皆宜以碑補  
之日下舊聞據涿州志錄此文多刪削亦由未見石本也

大明禪院鐘識

正書  
陰文

鐵鐘今在東昌府署西舊鐘樓廢臺下予主書院日洵諸  
生以訪古刻所在後乃得于此爲手拓其文有云大明禪  
院口法住持沙門僧恒周師伯法仙等名又另方題本鎮  
商酒都監修武校尉張令聞同監口本鎮祇候阿里振孫  
殿試後題大金國承安二年六月二十四日鑄造口鍾一  
顆重一萬三千餘斤又各方題博州堂邑曹蔡村開山鎮  
賀蘭鎮西雙店諸地名及出貲人名氏多作太公二公大  
舅姑夫等稱皆俚俗人相謂鑄之金識甚可嗤也元豐九  
域志東阿有關山鎮江本作開山與鐘識同金史地里志  
亦作關山而賀蘭鎮史更未之及又稱博州維那大金國  
志浮圖之教在京師曰國師帥府曰僧錄僧正列郡曰都

綱縣曰維那今博州亦稱維那志失載也東昌府志列金石一門此反佚不備載益嘆採訪之疎在耳目所及尙有未及況其僻棄于遠者與此鐘旣稱本鎮當時營造不在州治所亦未知其造于何鎮俗傳自水中漂浮得之

濟陽縣創建宣聖廟碑

正書承安三年  
六月在濟陽

右碑斷裂幸無大損剝前列朝散大夫行太常寺口騎都尉潁川縣開國男食邑三百戶賜紫金魚袋陳大舉撰承直郎行口御史監察驍騎尉賜緋魚袋口篆額鄉貢進士張濟書丹金史百官志監察御史十二員碑以御史結銜加於監察之上疑上缺字爲侍字蓋以侍御史兼監察也碑稱濟南屬縣有七水陸俱通四方游販歲集而月至者

莫如濟陽後敘縣舊無廟學仲丁釋奠皆借僧房驛舍有諸文士唱之度地庀材成廟加於他邑又云邑自天會八年改置而來地里志不見改置始末攷齊乘濟陽本漢朝陽唐宋之臨邑章邱地金初劉豫割章邱之標竿鎮及臨邑封圻之半置濟陽縣屬濟南据是碑稱天會八年是爲太宗建元之庚戌明年劉豫始僭僞號阜昌元年蓋改置屬濟南不由於豫于氏所記誤也又後題銜者四人宣武將軍行縣尉騎都尉金源縣開國男食邑三百戶完顏口徵事郎行主簿兼勾常平倉事范汝霖將仕郎守縣丞兼管勾常平倉事楊溶定遠大將軍縣令口管勾常平倉事輕車都尉廣平郡開國伯食邑七百戶李朮魯口口常

平倉本以州府官提舉縣官兼提舉此又主簿丞尉並兼管勾矣皆志文所失載

會善寺請寶公長老疏 正書承安三年七月

疏鐫勒一小石頽仆在寺門外已砌置作階基予遊嵩山訪碑手自爬剔出之文尙未損泐皆可讀屬成句蓋延寶公住持是寺啟疏所由也後列銜將仕郎教授推府判盧奉議大夫河南府判趙中順大夫河南少尹完顏三人皆氏而不名証之府志盧詢高平人為河南府教授即疏所記教授推府判者也志未明盧詢到任及陞擢年月閱此疏在承安三年七月亦足以知盧詢歷官之時矣後又有中憲大夫同知河南府尹事但書銜名氏皆不具

太原王氏墓記 正書承安四年二月在孟縣

記為鄉貢進士孟州學正雷文儒撰學正門人鄉貢進士劉淮書丹并題額刻于石幢經文之後內引孔子曰惟孝友于兄弟施於有政按古讀以孝乎惟孝絕句自偽孔書傳出乃以惟孝友于兄弟牽連成文尙書古文疏證深詆其悠謬并据淳熙九經本點斷句讀號稱精審亦以孝乎惟孝斷句則知改從君陳篇讀者實自朱子始今此碑所引當承安四年于時南北阻絕集註必不能廣逮敵境而朱子又晚年始脫稿則因仍君陳之文此塾師所授讀非一日矣閻氏之論或未然也

武威郡侯段鐸墓表 張萬公撰泰和二年四月在稷山縣

表載段鐸歷官事跡最詳審攷鐸于金史無傳惟附見梁襄傳曹州刺史段鐸薦襄學問該博鍊習典故者是其人也予約舉表所稱鐸字文仲與兄鈞同遊場屋都人呼稷山二段正隆二年登進士第五人第調長安簿守絳州絳縣秩滿除天德軍節度判官移宰耀州繼宰涇陽改充尙書兵部主事授同知棣州防禦使事復被命審決河北路刑獄事改中都都麴務超授大名府治中兼本路兵馬副都總管尋授曹州刺史移鎮平定未幾徙節授華州防禦使懇求致政躡進兩階授中奉大夫加護軍封武威郡開國侯增邑三百戶食實封一百戶俸祿仍給其半以泰和元年五月歸里是年十一月卒蓋鐸所居官皆有實驗爲

當時所稱而在棣州時河決滑衛間故相劉瑋辟工督役按之劉瑋傳河決于衛自衛抵清滄皆被其害詔兼工部尙書往塞之與碑文合瑋有幹力其所辟如鐸者洵亦賢矣中都都麴務百官志中都麴使司卽其職子惟忠惟孝一守華州鄭縣赤水鎮酒務同監一守華州蒲城縣荆姚鎮酒務同監志言酒課不及三萬貫者爲院務設都監同監各一員此二鎮有同監是也

崇公禪師塔銘

正書大安元年三月僧不昭撰口柔書在登封少林寺

序稱師諱興崇俗姓侯氏汾陽西河人大定二十七年誦法華經中選受具之後首詣少林寺參照禪師會山陰羅漢禪刹虛位光祿大夫駙馬都尉蒲察知河南府洎同知

許中順命師主之照公退席少林駙馬泊治中驃騎紇石  
烈請師移踵其迹泰和七年五月南京統軍鎮國徒單榮  
祿大夫六駙馬都尉國子司業劉奉直同知孫中順治中  
武奉直具疏請師開堂後以泰和八年九月二十七日作  
偈辭衆案金史世戚傳贊金之徒單拏懶唐括蒲察裴滿  
紇石烈僕散皆貴族也天子娶后必于是公主下嫁必于  
是此銘稱駙馬都尉蒲察徒單六駙馬都尉是以貴族尙  
公主而世戚不附其名劉奉直者劉昂也中州集昂爲當  
塗者所忌連蹇十年卜居洛陽有終焉之志有薦其才於  
道陵者泰和初自國子司業擢左司郎中此疏稱國子司  
業合又崇公崇字凡四見崇下示俱作未按孫卽康傳上

問卽康參知政事賈鉉曰睿宗廟諱改作崇字其下却有  
本字全體若將示字依蘭亭帖寫作未字云卽康奏乃  
擬睿宗廟諱上字從未下字從世今碑崇下示正作未是  
也與字缺、今碑稱大安爲衛紹王之建元衛紹王諱允  
濟小字與勝其缺、亦當爲此而史不及悉載矣

洞真觀勅牒并記

行書大安三年十月在萊蕪

右碑上鐫尙書禮部牒另行小字載登州棲霞縣王玖同  
邱處機狀告泰安州萊蕪縣山口店長豐村舊有道院并  
白鶴村屋宇地土等一所未有名額今賣到乙字第十一  
號觀額乞書填作洞真觀者案輟耕錄邱處機金皇統戊  
辰生戊辰爲熙宗之八年至泰和八年處機已六十一歲

于時附名爲請觀額蓋已主道教矣寺觀名額大定五年以邊鄙已定遂罷鬻賣至承安二年賣度牒師號寺觀額此牒稱賣到乙字號者以承安制爲之也中行小字嘉定元年泰和捌年閏四月旁書金主璟無印文惟空方正書一印字他勅牒未有此式後題員外郎不書氏官闕員也朝請大夫郎中兼國子監丞王口口大夫禮部侍郎兼秘書少監喬未行當是尙書結銜殘斷其可見者有國史字張字案金史完顏匡傳泰和八年五月丁未遣禮部尙書張行簡奏告天地今尙書銜未署張字卽其人行簡傳泰和六年召爲禮部尙書兼侍講同修國史秘書監此題銜有國史字與傳相符然攷宋嘉定改元方函韓侂冑蘇師旦首入金求和則勢亦孱弱不支而金鬻額以宋年號冠其本國之上又直斥金主名及下立石在大安二年亦同書金主永濟名未詳何以敢指斥如是最末題昭勇大將軍行萊蕪縣令兼提舉常平倉事烏古論桌忝食貨志所謂常平倉以縣官兼董其事者卽兼提舉之謂也


請琮公開堂演法疏 正書在魯山縣城荷福寺

石刻前題皇弟韓王府後題皇弟開府儀同三司太子太師韓王案金史世宗諸子傳元妃李氏生鄭王允蹈衛紹王允濟潞王允德允德傳云大定二十五年與章宗及諸兄俱加開府儀同三司衛紹王時累遷太子太師此疏結銜皇弟開府儀同三司太子太師正值大安三年與傳稱


衛紹王時累遷官合是所題卽允德也傳稱允德封薛王進封瀋王幽王潞王不言進封韓王案衛紹王紀大安元年旣進封兄永功爲譙王則允德以懿親之重亦當並封是韓爲所進府號當時缺錄也史贊云衛紹王身弑國蹙記注亡失南遷後不復紀載故宜有此宜取以補史遺衛紹王明昌二年進封韓王今允德亦得此號紹王與之同母遂以自所封號示寵異與

十方靈巖寺碑陰題名

右碑陰得題名一行書文云冠氏帥趙侯齊河帥劉侯率將佐來游好問與焉丙申三月廿五日題按此遺山手跡也丙申爲蒙古太宗之七年于時金亡三年矣遺山集冠氏趙侯先瑩碑稱冠氏帥趙侯名天錫其字受之今爲東平左副元帥兼分治大名府路同知兵馬都總管事宜授行軍千戶者卽此題趙侯也遺山客冠氏又與趙侯銘其先人宜其陪此勝遊爾又有留題靈巖詩後書丙辰冬至日蓬山劉蕙淵識此丙辰詎前丙申二十年亦爲蒙古憲宗時也







授堂金石文字續跋卷十二終

受業大興張為校

授堂金石文字續跋卷十三

偃師武億虛谷著

男穆淳編

孫未重校刊

元中京副留守陳規墓表

段成已撰蒙古憲宗八年在稷山縣

表載陳規擢明昌五年進士第歷華州下邳平陽臨汾三

縣簿試書判入等知臨洮渭源口改潞州觀察判官遷和

口令知恩州歷亭縣轉京兆府路按察從事丁父憂去職

召入為開封府判官拜監察御史出同知壽泗二州實經

歷徐州行院移授宿州節度副使經歷元帥府事入知登

聞鼓院改刑部郎中拜右補闕升右司諫出為中京副留

守兼倅河南府事未到官卒凡歷十六官階累至中議大

夫勲上輕車都尉爵潁川郡開國伯食邑七百戶案之金

史本傳所書惟監察御史徐州帥府經歷官右司諫權吏部郎中改充補闕從出爲中京副留守其他歷官皆從略傳言規貞祐四年三月上言臣巡按至徐州此正碑稱經歷徐州行院時也傳繫此文于爲監察御史之後而傳書出爲徐州帥府經歷次于七月所上八事之末前後失次深違其實又碑云改刑部郎中守法不阿而傳作吏部表言規排斥權倖章奏無虛日雖得君如高丞相某侯平章某師右丞某事不厭衆望皆極言其失以史案之高汝彌拜尙書右丞相師安石進尙書右丞侯摯爲平章政事此三人獨摯爲規所彈見于傳餘亦不及之表言規子男一人曰至燕而亡二孫元允皆卓卓有文名傳載子良臣中州集同元允二孫名史畧之矣規之卒表言歲己丑是爲哀宗正大六年又二十有九年成己始表其墓蓋已當蒙古咸宗八年矣規旣以直不容而遭時多艱未竟其用喜得此文表之故述其跡以補金史

太清宮聖旨碑

正書中統二年四月在鹿邑

元聖旨碑首席據張真人奏告亳州太清宮住持道人每元受令旨使臣軍馬宮觀內不得安下所有栽種樹木諸人不得採斫專與皇家告天祝壽今將元受令旨已行納訖乞換授事准奏仰亳州太清宮道人每照依舊例云云仍仰張拔都兒常切護持太清宮令住持道衆更爲精嚴看誦與皇家子子孫孫告天祝壽者後題中統二年四月

二十七日鈐璽處無璽文惟旁注御寶二字較耕錄漢人賜名拔都者惟文忠武王與太師張獻武宏範及真定新軍張萬戶興祖耳攷興祖以至元十九年從阿里海牙南取漢郢有功後以國言賜名拔都則此旨張拔都兒當中統二年決非興祖又考元史張宏範傳至元十二年改亳州萬戶賜名拔都今旨內仰常切護持非守土者不當有是委任故指爲宏範於事爲近然此旨實前于至元已稱張拔都則改亳州萬戶及賜名拔都不于至元十二年矣或云宏範父柔當憲宗卽位常移鎮亳州拔都宜爲柔所賜名按中統元年詔柔入衛京師二年已請致仕于時必無以護持宮觀委之也世祖紀中統三年九月戊午亳州萬戶張宏畧破宋兵於蘄縣蓋宏畧襲職必蒙賜以此號史失錄也又列傳載張拔都爲昌平人流矢中頰不少却帝聞而壯之賜名拔都而歸老最早不及中統時然則漢人賜名拔都者又其一矣張真人不稔其名案道園學古錄國朝之制凡爲元教師者得在禁近號曰真人給以印章得行文書如官府卽此記所稱是也

修釋迦院記

草書中統二年十月在河內縣西莊

碑列比丘守顯記並書張天祐篆額而守顯又自署住持彰德府天寧禪寺退院嗣祖蓋以方外猶牽情退院世念未忘至列於石刻是可嗤也碑首行題大朝國懷州河內縣南岳村尼首座崇明悟釋迦之院今此地李清化鎮之

西北無人知是村名南岳矣予向與康君少山睹是碑下  
截陷淤土中歸遣人必剔拓數紙爲錄於此以見吾儕所  
好與世異趣也

廉訪使楊奐神道碑

正書中統五年  
四月在乾州

碑首列河東元好問撰柳城姚燧書并篆額燧奐之第三  
女婿也稱柳城著其祖貫也文載奐始末頗悉元史取以  
爲傳今碑所云唐鄆國公二十世孫唐書宰相世系表鄆  
國公侑卽其人侑父昭元德太子世宗孝成皇帝碑序世  
系不及之者諸侯不得祖天子也元史本傳奐行迹歷官  
史亦有未盡錄者以碑証之初因州倅宗室口命爲口倉  
典書又辭不就臺榭其後乾州請爲講議安撫司辟經歷

官京兆行尙書省以便宜署隴州口口皆不赴唯一應叅  
乾恒二州軍事奐之自守如此亦名爲無所苟矣碑間有  
訛字年三十三年作不改弦更張更作吏爲萬言策爲作  
萬

修建長春觀記

正書中統五年五  
月在孟縣吉里村

記前書孟州口口河陽縣教授尙企賢撰篆額武昌後  
進楊仁書丹濟源縣苗天澤正文按正文蓋書石後校其  
訛脫亦郭香察書之例也記言宗師東遊寧海得邱劉覃  
馬之英材唯劉真人住持萊州神山武觀有周老者願立  
下風真人慮其飾外喪真當以慙自處因目之曰慙周朝  
廷特賜以清虛真人之號後見解公機緣宿契禮接甚厚

解公長春深器重之賜以洞真子之號以志通爲之諱元  
史釋老傳邱處機爲全真學于寧海之崑崙山與馬鈺譚  
處端劉處元王處一郝大通孫不二同師王嘉錢少詹事  
云史以處端作譚當依此碑作覃爲正案詩實覃實紆釋  
文云覃一作譚是覃譚爲一字也長春應詔與弟子偕往  
者十有八人而劉處元之徒予所見惟此碑慈周及志通  
耳然志通亦師長春則道之北宗邱惟獨熾已碑後列宣  
授孟州長官范真宣差孟州達魯花赤阿里河陽縣令師  
福亨河陽縣簿尉羅信諸名百官志諸蠻夷有長官司今  
設于孟州當時以河南甫定孟猶邊鄙故宣授長官耳上  
州名州尹中下州名知州縣皆稱尹至元二十年制如是  
此云長官及令者中統時沿此名史未備錄也簿尉令尹  
官爲一名當卽以尉兼簿之制范真阿里並見重立孟州  
三城記云壬辰天兵南渡有京西總帥范官率所部歸附  
大朝更賜金符治所屬之民兼領于孟後又稱中統二年  
欽奉聖旨宣授孟州長官又云公諱真字彥誠登封人亦  
附曷思麥里傳金總帥范真率其麾下軍民萬餘人來降  
者是也

重立孟州三城記

正書中統五年  
八月在孟縣

記爲孟州學正尙企賢撰書者名氏已殘剝記云舊州瀕  
河地勢卑濕水泉瀉鹵民居墊隘大定戊申防禦使么公  
移築于此至興定庚辰猓貅一拉掃地無餘及壬辰天兵

南渡有京帥總師范公率諸部衆齎所帶虎符口次下金銀碑印口口本朝以爲口禮天恩優渥更賜金符治所屬之民兼領于孟丁已欽受恩命復立新孟乃召耆老舊人圖畫街衢標注坊巷葢州之移建略具此矣金史完顏仲德傳西山帥臣范真姬汝作等各以馬進姬汝作傳哀宗詔峴山帥延實登封帥范真併力討梟曷思麥里傳遣蒲察寒奴乞夫烈札魯招諭金總帥范真率其麾下軍民萬餘人來降卽此碑范總帥也元史地理志孟州金大定中爲河水所害北去故城十五里築今城徙治焉故城謂之下孟州新城謂之上孟州元初治下孟州憲宗八年復立上孟州案碑言大定戊申爲金世宗建元之二十八年明

年已酉禪位于太子惇則不得稱大定中矣其州之徙治亦由瀕河卑濕不言被河患然則志所攷未審其實也碑言天開中統欽奉聖旨宣授孟州長官又以真爲之而民遠近相賀真雖降將固一方所毗也孟州達魯花赤阿則稱宣差百官志亦唯見宣授之文此作宣差或元初制如此

分司揆務重立孟州碑

右碑文刻在修孟州三城記之陰序范真興復州城及僚屬佐吏諸名氏不書年月蓋以碑陽已有中統五年此當與同時記也分司揆務不審官職所屬疑亦行中書省之異名又孟州有長官有達魯花赤有通事有權州有都目

吏目孔目有總補盜官有酒稅官有學錄有祇應官有懷孟路起到管立城民戶總把有頭目有僧正道正道判有庫官有孟州渡提領百把渡官有黃河巡檢元史百官志自至元三年所定州縣官數記之而前制皆從畧于是見元代立國之初遺典罕有知者矣碑載孟州屬縣四皆有提領縣令縣丞簿尉一員典史二員與志稱中統五年併立州縣未有等差者合而縣各設提領志亦不載亦以併省故也

追封魯郡公許公神道碑

正書歐陽元撰趙孟頫書至元四年八月

碑載許熙載字獻臣初以行省檄辟德慶路提控按牘由是以本職歷永衡兩路湘潭一州凡三考成資調長沙稅

使遷臨江撫州兩路總管府照磨進將仕郎湖廣行中書省理問所知事改從仕郎會福院照磨兼管勾承發架閣庫熙載有壬父也附元史有壬傳後然書其官階甚略又傳云熙載仕長沙日設義學訓諸生既沒而諸生思之爲立東岡書院朝廷錫額設官以爲育才之地以碑考之有壬喪母宋夫人旅殯原上苦由廬墓者三年後長沙人卽公廬墓之地作書院以表其孝請于中書得永額然則書院賜額爲有壬孝思所致與史所書不符豈由當時木八刺沙構怨言以書院不當立而爲文者故有微詞與傳載有壬二弟有儀有孚碑書有儀經筵檢討武昌水陸事產副提舉有孚國學上舍生登至順元年進士第授承事郎

湖廣等處儒學副提舉改湖廣行省檢校官皆足補史傳書官之畧

重建普門塔銘

正書至元十六年八月在邢臺縣

普門塔自寺僧崇儼於至元丁丑懇國師璉真上請賜銘遂以崇湛所具事迹文之蓋寺舊有塔曰圓照癸酉燼于兵逮辛卯歲萬安恩公迺圖興復經始于重光單闕之仲春斷手於上章困敦之秋越癸卯冬師遂示寂嗣僧崇朗因太保劉秉忠奏請賜名諡曰宏慈溥化大士勅寺額曰大開元寺塔曰普門之塔按璉真卽楊連真加也當時以璉真之橫旣爲江南釋教總統宜諸僧徒依附以干上恩也碑爲翰林待制奉訓大夫王暉撰正奉大夫中書省參

知政事安西王相商挺書金紫光祿大夫平章軍國重事監修國史耶律鑄篆額三人皆以奉勅爲之元史列傳暉至元十四年除翰林待制拜朝列大夫今碑題作奉訓大夫攷奉訓階從五品朝列階從四品當由初階奉訓進拜朝列史失紀也挺至元元年入拜參知政事九年封皇子忙阿刺爲安西王立王相府以挺爲王相碑所題與傳合惟不書正奉大夫階耳傳載阿難答嗣安西王仍命挺行王相府事後以二郭與趙炳構隙妃囚炳死挺坐徹徹語連挺亦下獄十六年春有旨挺不可全以無罪釋之冬始釋挺据是則挺被繫在十六年矣此碑所立挺豈能奉勅爲書依諸王表所紀阿難答正元十七年襲封而郭趙之



釁始開又未幾挺下獄而被釋則當在十六年後証之趙炳傳炳為郭琮黨毒死獄中已在十七年三月以見挺傳十六年之誤也鑄至元四年六月改榮祿大夫平章政事五年復拜光祿大夫中書左丞相十年遷平章軍國重事十三年詔建修國史碑題銜同此其光祿大夫加金紫傳文不備

濟寧路錄事司廳壁記

正書王質記楊仲元書在鉅野

記前載至元丙戌春正月本路創立錄事司達魯花赤薛里吉思于省部闕到錄事司并與魯印二顆與錄事兀都蠻於鉅野縣尉司廨宇內署事二月錄判張福又賫捕盜印前來理任三十一年春承路官命移錄事司於舊祇應

庫為司元貞二年薛里吉思復任遂因庫司增新營築凡正廳司房咸與有成大德元年仲夏也案元史地理志濟州至元二年以戶不及千數併隸任城六年遷州於鉅野八年升州為濟寧府治任城復還府治鉅野十五年遷府于濟州以鉅野行濟州事其年復于鉅野立府今記題名諸銜皆稱濟寧府與志文合壁記之作在大德元年五月而題名自至元二十二年訖延祐四年所序到任下任代謝病闕其事特詳前後歷官二十三人至元元貞間皆書名大德以後書字書籍貫序刻者踵事益之也官有錄事有判官百官志錄事司中統二年詔驗民戶定為員數二千戶以上設錄事司候判官各一員二千戶以下省判官

不置至元二十年置達魯花赤一員省司候以判官兼捕盜之事此訖至元二十三年薛里吉思任書達魯花赤銜蓋由二十年置此員也兼管本司諸軍與魯歷任皆有之志闕而不書所未詳也判官兼捕盜記文稱錄判張福賚捕盜印者即其事

無住禪師碑

正書至元二十三年三月今在涿州

碑前列翰林院編修王頤撰大都海雲禪寺前任持傳法嗣祖沙門西雲子安書丹翰林國史集賢院領會通館道敎事正奉大夫安藏篆額無住馬氏諱智廣世居懷慶河內初禮本縣閻公宗主為師後歷叅萬松老人清隱湛公西菴仲休皆有密契遂為奉聖州前經畧使王國寶敬請

住持州西雲濟寺又開法法雲等更主東禪西禪二院最  
後居北塔雲居今碑所識可按如是萬松老人僧行秀嘗  
號萬松野老也

重修三官廟記

正書至元二十四年三月在孟縣摘星廟內

記為懷孟路學政李孝純撰懷孟路剋擇陰陽官管勾王德政書并篆額其文云三官之號他書不載獨道經稱之其詳不可得聞蓋取無極之道一以生二二生三三生萬自是而計無不在其中矣而又上世貴質制有鳥官人官故以三為元數官為定名從省文也按孝純所撰皆摭取道家之緒言近趙耘菘陔餘叢攷所据古書記稱三官之事特詳然於此亦未嘗及也故予為存其概孝純見哀恒

山公詩題為將仕郎臨漳縣主簿者疑即其人

濟州重修大成殿記

八分書至元三十年二月在濟寧州

碑上半兩溜殘蝕斷痕交錯惟下半尚全其云州為鉅野地居下流河數為患金天德三年徙治任城又云至元甲申口州冀侯德方自沐來監是郡又云具書幣聘東平文儒楊演蓋紀州治廢徙以逮新廟所起其略如是元史地理志載金遷州治任城以河水湮沒與碑同金史地理志稱濟州舊治鉅野天德二年徙治任城縣則訛三年為二是其失也甲申為至元二十一年殿之告成實二十八年辛卯最後列銜前翰林侍讀學士知制誥為撰文者名已缺又列直學士口直郎楊文乃篆額文下殘字當是郁字

至元二十二年焚毀諸路偽道藏經碑列翰林院臣唐方

楊文郁即其人也

歸田類藁濟南劉氏先塋碑銘云常謁故翰林學士損齋楊先生文郁銘其父

從仕郎前秘書監丞楊桓書丹桓元史有傳云中統四年

補濟州教授召為太史院校書郎遷秘書監丞博覽羣籍

尤精篆籀之學此碑書字道整可見其餘也又下銜名俱

不全惟承務郎濟寧路同知濟州事兼管本州諸軍奧魯

劉庭玉名存

創建福勝院記

正書至元三十年九月

碑完好首題大元國濟南府鄒平縣齊東鄉文山法淳撰陽邱書丹文云玉和尚者陽邱臨清人也姓邵氏自二十出家後至承安三年經義中選賜紫衣號曰通惠大師及

歲次丙戌間外護功德主宣授管領濟南等路軍馬萬戶孟德發心敦請創建甲第號曰福勝院碑所記興建丙戌歲者至元二十三年也予壬子十二月歸自京師由商河迂道得此碑于村鎮呵凍為錄其概按于氏齊乘齊東縣舊趙巖中金為齊東鎮劉豫置來河巡檢司金亂天兵南下城之壬子年因置齊東縣屬河間路癸丑年割屬濟南至元二年還屬河間此題鄒平縣齊東鄉當以縣已改隸而鄉猶仍其舊名與碑陰載僧徒宗派亦無剝泐

授堂金石文字續跋卷十三終

受業汝州王孝方校

授堂金石文字續跋卷十四

偃師武億虛谷著

男穆淳編

孫未重校刊

元孟子墓碑

正書元貞二年二月

碑自東陽司侯尹鄒屬導江張頌謨文屬解印未入石文

山向茂繼成其事頌見元史儒學傳云其先蜀之導江人

蜀亡僑寓江左孔思晦傳亦云授業于導江張頌今碑自

題導江舉祖貫也在維揚來學者尤眾遠近翕然尊為碩

師不敢字呼而稱曰導江先生大臣薦諸朝特命為孔顏

孟三氏教授鄒魯之人服誦遺訓久而不忘以碑後邑人

邵景劉之美所記亦稱導江先生其為時重望洵不虛也

文載宋景祐四年歲在丁丑孔公道輔守兗州訪孟子墓

得于鄒縣東北三十里四基山之陽宋史本傳止云徙兗州未識其年月証之此碑及道輔祭祖廟文自景祐二年至四年並在兗州矣文又載孟子出處以孟子當周顯王三十三年乙酉至魏慎靚王二年壬寅去魏適齊赧王二年戊申去齊居魏十八年居齊六年按此依通鑑爲據通鑑從竹書紀年以襄王十六年繫于惠成王則計惠王在位凡五十二年故云居魏十八年然孟子久滯梁國寂無所施而遲回至此道固可以虛拘耶竊以義有所未安也導江此記頗能自肆其說故吳澄序其書以爲議論正援据博觀此亦足例其餘矣

饒陽縣新遷廟學記

正書元貞二年三月在饒陽縣

記爲奉訓大夫國子司業太原王構諡朝列大夫前都水監饒川高源書奉訓大夫太常博士王田楊遇篆額構源元史並有傳構成宗立由侍讀爲學士此記元貞二年題銜爲國子司業當以待讀序轉至此史失書也傳言東平人而構自稱太原舉郡望也源僉江南浙西道按察司僉除河間路都轉運副使至元二十四年爲江東道勸農營田使二十八年遷都水監碑載前都水監與傳符惟記稱浙西道察司僉事不言江南及按字書石者不能無誤于此矣源實晉州饒陽人故題饒川而記內亦稱邑人較史文但舉晉州者爲詳也廟學之遷初由蓋吾李璧宰斯邑首謀經畫璧見元史帝師八思巴傳至大元年上都守開

元寺西僧強市民薪民訴諸留守李璧當卽其人

扁鵲廟記

正書元貞二年六月在南宮縣

記載扁鵲之祠直龍岡西北號曰神應王藥局司令高濟陋其舊構欲曰之不克而歿至元壬辰其孫天明為成厥志今記後列南宮縣濟民藥局司丞者是其人也神應王宋政和四年碑記已有是號故元代因之其稱濟民局則當時縣設是員倣于大都惠民局上都惠民司踵事增置也記將仕郎國子學博士康繼禮撰宜授真定彰德官醫提舉劉潛德書元史百官志大都保定彰德東平四路各設提舉一員而不言真定今碑言真定疑史有誤脫也宜授者文散官由一品至五品為宜授皆以制命之官醫提

舉司秩從五品故題云然

重刻哀恒山公詩

正書大德四年閏在鳳台縣天井關

哀恒山公詩刻完好為將仕佐郎臨漳縣主簿李孝純所題後有小記云公姓武諱仙金末名將河北九公恒山其一也恒山失利拔身南歸扈從路經此關為守者所識邏兵捕之公欲潰圍去而拔劍不出重傷被獲是夜大星隕天鼓鳴乃終蓋孝純之子職官澤州儒學正以父嘗作是詩在宣聖廟柱石已殘缺故跋而重刻諸石武仙金史有傳甲午蔡州破糧且盡將士大怨皆散去仙無所歸乃從十八人北渡河又亡五人五月趨澤州為澤之戍兵所殺証之此記似以仙南歸扈從時被害于此與史不相符然

授命之日能致星隕鼓鳴之異亦一逸事可紀也河北九公者王福滄海公移刺衆家奴河間公張甫高陽公靖安民易水公郭文振晉陽公胡天作平陽公完顏開上黨公燕寧東莒公與恒山爲九見苗道潤傳孝純字敦夫詩附錄于此金鼎冥冥座已遷將軍忠勇力扶顛井闕未度星先落神策潛揮劍不前一把骨隨秋草朽千年名有此山傳作詩膾炙行人道留爲他時太史箋採逸詩者所未錄也

漁庄記

大德十年閏正月

記石近山土陳儼撰其文序雲卿自述我汲縣府君買田洹上爲菟裘計願未之遂齋志以沒從益無似繫官於朝

乃弗克搆今茲幸若弛擔歸守桑梓始獲作我攸字迄今三十餘年始克卒成先志從益字雲卿元史不爲立傳仁宗紀至大四年召世祖朝詣知政務素有聲望老臣給傳詣闕同議庶務內有叅政韓從益卽其人也亦見英宗紀至治三年授前樞密院副使吳元珪王約集賢大學士翰林侍講學士韓從益昭文館大學士並商議中書省事然則從益以老成之重爲兩朝所毗倚彼其先固由恬退以植其素故也記又稱從益西曹投簪而後除廣平牧改樞府判俄又拜奉常卿並可舉以脩史遺文

有商烈祖聖帝廟碑

正書至大元年十二月在孟縣

碑爲保直大夫河南江北等處官醫提舉杜天智撰武略

將軍前鄧州知州兼署本州諸軍奧魯勸農事師福亨書  
丹資德大夫中書省右丞議樞密院事調諸口屯田勾當  
陳天祥篆額元史列傳天祥字吉甫大德九年五月拜中  
書右丞議樞密院事提調諸衛屯田與碑合碑石諸字下  
殘剝以傳証之當作衛字也元史百官志樞密院至元二  
十八年又以中書平章商量院事攷碑言議樞密院事卽  
志所謂商量院事而此以右丞兼是職豈平章與右丞同  
爲宰相固可以品相近者並爲之與抑初以平章而後廣  
及於右丞也與

鎮國上將軍竇玉神道碑銘

正書至大二年  
二月在孟縣

碑爲翰林學士承旨正奉大夫知制誥兼修國史閻復撰

榮祿大夫平章政事議樞密院事史弼書二人元史並有  
傳復拜翰林學士承旨正奉大夫與碑相符其兼官則  
從畧不書弼元貞三年陞平章政事加銀青榮祿大夫今  
碑作榮祿大夫與傳小異又議樞密院事傳亦闕載竇玉  
者孟州河陽人史不爲傳附名于伯顏傳內戰守最著奇  
績與碑詳畧互見然歷官所書太畧予據是碑爲補著之  
玉初畧盟津渡長從世祖渡江以勞補百夫長中統初定  
鼎于燕召充河道官至元十二年拜管軍千戶佩金符遷  
宣武將軍管軍總管明威將軍鎮守長橋等處總管尋降  
虎符職任仍舊任昭勇大將軍管軍萬戶未幾就帶已降  
虎符鎮國上將軍浙西道吳江長橋都元帥沿海上海戶



佩金虎符大德六年終于家子居仁居証居贊元貞萬奴  
袁州路修建記 八分書至大二年季夏

記文首列從仕郎江西等處行中書省檢校官杜與可撰  
并書朝列大夫江西湖廣道肅政廉訪副使蔣元祚題額  
今案其文云袁名田山山曩居漢袁隱君名繇主領邑四  
較萃鄉戶尤繁元貞制州之概傳版氓貳十萬是郡于江  
西爲上又云至大初元侯長忽都魯脫因總管朶兒直偕  
僚屬增廣舊制益賓幕貳十六楹閣敞牘庫四十六楹時  
同知舍刺甫沙治中暗都刺哈蠻判官馬合麻沙推官孟  
誠經歷李貞知事成翼照磨按牘萬國良董役分宜縣主  
簿慕嗣宗府掾袁賢張顯忠諸人後題袁州路總管府達

魯花赤兼管內勸農事忽都魯脫因少中大夫袁州路總  
管兼管內勸農事兼管造茶勾當朶兒直立碑僻置遠方  
著錄者罕能覓也

加封大成至聖文宣王碑陰題名 正書

碑陰列諸職銜各題與碑陽書至大四年以一時上石也  
其前載鹽運官屬有中大夫前山東東路都轉運鹽使不  
兀及朝請大夫前山東東路都轉運鹽使王景福嘉議大  
夫山東東路都轉運鹽使亦逢中大夫山東東路都轉運鹽  
使劉亨凡四人元史百官志每路都轉運鹽使二員此題  
稱前者上石時已謝事猶與見任附書也不兀及王景福  
亦逢劉亨蒙古漢人兼用之其山東改立都轉運司當至

元十二年碑悉與志合後又載同知副使判官經歷知事各一員他路運判二員此唯一員者山東東路所置也又載提控案牘兼照磨承發架閣志唯稱照磨一員亦與碑異後又載總管府官屬懷遠大將軍濟南路總管府達魯花赤兼管本路諸軍與魯總管府達魯花赤管內勸農事卜蘭僖董搏霄傳至正十七年毛貴陷益都般陽等路有旨命搏霄從知樞密院事卜蘭奚討之卽其人傳後又作卜蘭蹊僖奚蹊皆譯字無正文也又載副達魯花赤同知治中判官各一員推官二員經歷知事提控案牘照磨兼承發架閣各一員副達魯花赤卽志所云同知異名而官一也照磨兼承發架閣而未言提控案牘志亦與碑異

加封大成至聖文宣王碑

正書至大四年八月在濟南府學

碑上層鐫加封孔子文宣王詔下層鐫此文爲郡人中大夫前河南江北等處行中書省叅知政事劉敏中撰并書題額元史列傳敏中字端甫濟南章邱人武宗卽位拜河南行省叅知政事案百官志至元二十八年以河南江北係要衝之地又新入板圖宜於汴梁立省以控治之蓋河南江北設行中書省自此始矣敏中旣蒞此官而傳唯稱河南行省脫江北字皆不如碑之自紀爲審碑所序加封至聖事予舉其要者云大德十有一年七月制加孔子號大成至聖文宣王播告天下至大改元之三年臺省檄令在所立石紀其事于學按祭祀志書加號在至大元年

武宗紀書稱大德十有一年

成宗紀亦書大德十一年七月辛巳加封至聖文宣王為

大成至聖文宣王與碑合攷紀文明言可改大德十二年為至大元年

則逾年改元紀文與碑合而志書大德十一年即為至大

元年載錄不檢也又碑內述唐元宗開元廿七年追諡孔

子文宣王宋真宗大中祥符元年加元聖五年改至聖証

之宋史禮志以國諱改元聖文宣王為至聖在二年今碑

作五年或上石者之誤其謀為文作記者資善大夫遙授

中書右丞廉訪使阿都兀赤朝列大夫副使韓申奉議大

夫僉事創元兒奉議大夫僉事董璧徵事郎知事馮德凡

五人

重修顯聖廟碑記

正書皇慶元年十月在閩鄉

碑前列郭令公二十代孫承務郎歸德府亳州同知郭承

仁撰提調陝州三縣醫學事壽黎老人郭淵篆書元史地

理志亳州為下州同知當正七品而階承務郎則從六品

也提調陝州三縣醫學志言陝州領四縣至元三年省靈

寶入陝縣故此題云三縣與史合然官醫有提舉司惟於

河南江浙江西湖廣陝西五省至州置提調竟失錄也文

記顯聖自唐宋來並加修葺而封號由唐僖宗乾符三年

封應聖侯昭宗光化二年封普濟王宋太宗興國三年封

顯聖王神宗元豐間加昭佑二字大元成宗欽明廣孝皇

帝加封護國靈濟昭佑顯聖王爭澤帝然則原廟遞加崇

諡所由已久史文或多遺之故備錄焉

投龍簡記

正書周應極撰趙孟頫書  
延祐元年八月在濟源

記文作于至大辛亥六月而首序孟夏壬寅朔命特進上卿元教大宗師志道宏教冲元仁靖大真人張留孫等建周天大醮于南城長春宮案世祖紀中統十四年命嗣漢天師張宗演修周天醮于長春宮仁宗紀延祐二年九月丁未道士李若訥河南嵩山道士趙亦然各率其徒赴闕修普天大醮此碑記張留孫所醮史不見錄何也釋老傳留孫當仁宗卽位加號輔成贊化保運元教大宗師今碑稱志道宏教冲元仁靖大真人此必自武宗時已賜此號而傳惟載其武宗立陞大真人史文疎于錄記如此又復命集賢司直奉訓大夫周應極洞元明德法師崇真萬壽

宮提舉陳日新乘傳封香奉玉符簡黃金龍各二詣濟源清源善濟王廟天壇王母洞投沉致敬清源善濟王廟號至元二十八年春二月加封見祭祀志萬壽宮提舉以日新任之特爲一道流寄食耳與宋時爲致仕優老養賢者其制異矣

贈中憲大夫張成墓碑

正書建祐二年  
三月在成武

碑爲元明善撰趙孟頫書王毅篆額明善列銜翰林侍講學士中奉大夫知制誥同修國史証之元史本傳惟書其爲侍講學士餘皆不及之毅列銜資善大夫御史中丞仁宗紀延祐二年御史中丞王毅乞歸養親不許者是也碑序張成世爲濟寧虞城人父平仕金爲大河埽軍長金滅

三遷至成武按成自父祖以上居虞城則虞城不屬濟寧地理志虞城金沒于水元憲宗二年始復置縣隸東平路至元二年以戶口稀少併入單父三年復立縣屬濟州八年隸濟寧路復初臨文未嘗致審以後來割隸之籍當之失其實矣平有二子長林居虞城次成居成武與配合堇成武之小房里子四人長致由江浙行省都事入爲戶部主事中書省左司都事員外郎參議樞密院事戶部侍郎出使兩淮都轉運鹽使成所贈官由此也

任城二賢祠堂碑

行書延祐三年六月在濟寧州

碑文前列應奉翰林文字同知制誥國史院編修官朝散大夫前尚書省右司員外郎曹元用撰朝列大夫司農司

丞張楷書丹東平尙德勉篆額元史列傳元用因薦爲翰林國史院編修官除應奉翰林文字與此記同惟不書同知制誥其序季真爲任城宰太白作廳壁記述其善政今任城有二賢堂及太白酒樓按沈光酒樓記咸通辛巳歲所作惟二賢堂不知構于何時在縣治東北者故中書右丞龔公爲州時所築後易縣治爲驛舍濟州判官趙義甫於南城之巔更築堂以口二賢吏目靖明叔吳君璋皆詳雅古士相與協謀以底於成蓋文所記建祠事跡如是攷新舊唐書知章本傳載其歷官俱無宰任城事太白所記惟云帝擇明德以賀公宰之文旣未著其名字而稱許至于温恭克修儼碩有立撥煩彌閒剖劇無滯則益不類季

真之為人傳言有詔禮部選挽郎知章取捨非允為門廕子弟喧訴盈庭知章於是以梯登墻首出決事然則任城之宰其非賀公甚明而流俗率附相襲踵謬故予于此不得不附辨之

重修慈雲禪寺碑

正書延祐四年正月在濟寧州

碑首列銜亞聖兗國公五十五代孫莫州學正顏之義撰

續魯故子苑公五十人

五代僅載木一人里人李玉書并篆額按顏子稱亞聖

吳志諸葛恪傳與丞相陸遜書云自孔氏門徒大數三千其見異七十二人至於子張子路子貢等七十之徒亞聖

之德然猶各有所短然則亞聖蓋以通名諸賢故顏子亦

稱亞聖唐會要開元八年三月十八日元瓘奏

云云上以

顏子亞聖親為製贊唐充公之頌俾夫亞聖同之前美

五代史周太祖紀帝謂近臣曰仲尼亞聖之後今有何人

對曰有鄉貢三禮顏涉是顏淵之後玉海建隆二年十一

月己巳上幸學御製先聖文宣王及亞聖兗國公贊至後

稱為復聖見於元史文宗紀至順元年二月戊申加封顏

子充國復聖公會子邾國宗聖公子思沂國述聖公孟子

祭祀志同

鄒國亞聖公四配之號乃有定名今此碑當延祐四

年故尚仍舊稱也文云濟州任城今隸濟寧號為名邑地

理志濟州至元二十三年復置任城隸州今碑云隸濟寧

蓋州前于八年升為濟寧府也又云慈雲禪寺初于唐代

歲遠無所稽考迨晉朝時有小張翟村銀青光祿大夫檢

校國子祭酒兼御史上柱國翟暉重修綵繪逮我聖朝粵  
有彭村維那首李成泰用伊誠及小張翟村維那首打捕  
鷹房提領翟興力爲補葺是寺之廢修始末可考如此惟  
打捕鷹房提領百官志不見此文或亦提控之員與選舉  
志行省諸司劄付充提領案牘作提控按牘受院劄以是  
推之此碑稱提領由外劄付故也

貞潔堂銘

正書延祐四年孟春

碑爲儒林郎國子司業同恕擬前集賢學士通議大夫國  
子祭酒依前太子右諭德蕭剡書二子並見元史儒學傳  
同恕當仁宗踐祚卽其家拜國子司業階儒林郎此題與  
史合蕭剡傳載其除集賢學士國子祭酒依前右諭德而

階爲通議大夫則從畧焉其銘貞潔之由首云奉元韓氏  
母王節君朝廷旣已旌別又遭儀天興聖慈仁昭懿壽元  
全德泰寧福慶皇太后特降懿旨寵嘉而覆護之按后妃  
傳順宗昭獻元聖皇后延祐二年三月加上皇太后尊號  
卽此文所記也節君子世榮世隆乃口重閣嚴位寶書請  
鄉先生通議大夫勤齋蕭公銘而記之蕭公卽蕭剡著有  
勤齋文集記故以此號之然節君之名如此其顯而不得  
見諸史蓋亦不能盡書故也銘婦人稱節君亦金石例所  
希

重摹祭殷大師文碑陰記

延祐五年四月在汲縣

碑陰爲韓沖所記其述唐追贈殷大師以封詔祭文刻石

後懼震裂至元口年陳侯祐來尹是土命工復爲刊模一  
如舊制大德癸卯坤靈失寧再致顛隳延祐戊午今衛輝  
監尹二公相與協謀遂卽遣制臨摹上石樹之廟廷元史  
列傳陳祐字天祐至元三年授嘉議大夫衛輝路總管衛  
當四方之衝號爲難治祐申明法令創立孔子廟修比干  
墓且請于朝著于祀典然則記稱陳侯者卽其人大德  
癸卯坤靈失寧癸卯爲大德七年本紀與五行志並書是  
年八月地震太原平陽尤甚而衛輝之震据是記所云殆  
失載也此碑在元兩模中州金石記云寶刻叢編有此碑  
顧炎武以爲重刻者不知何据予以顧氏正据此碑陰爲  
文也

呂梁鎮慶真觀碑記

行書延祐六年

記前列將仕郎太常博士吳善撰翰林學士承旨口祿大  
夫知制誥趙孟頫書并篆額文云世祖皇帝建昭應宮祠  
元武神于京師和義門外以龜蛇嘗見其地又云成宗迓  
續登崇口號太子文學元公作杭口元武殿碑悉著其事  
又道書相傳其神三月三日降均之武當山今天子萬壽  
節以其日同故歲遣祠官致祭今天子謂仁宗也元史仁  
宗紀以至元二十二年三月丙子生是其事碑又云予嘗  
考于奉常禮秩其神曰黑天帝得並祀南郊位北故水之  
神曰元武水生于一故爲道者宗祭祀志從祀園壇第一  
等九位黑帝位亥與此記符後載慶真觀成于至大三年



寔由道士賈德真及其師金道明踵跡為之然稱道明壽七十九于揚州仙去德真收其冠劍葬之彭城者即死魄耳文人緣飾之而世遂信為委蛻以去亦何愚哉碑舊沒入土明萬歷元祀越黃猷吉出之未幾復就涇陳邦彥又募役共出之二人署銜皆工部主事日下舊聞載帝京景物畧昭應宮在雙林寺西元至元中建龜蛇兆焉即此碑所云龜蛇嘗見其地者也而朱氏失引搆採之難如此

元遺山題超化寺詩

行書在密縣

遺山題超化寺詩石刻錢太和拓一紙見寄予以全金詩校之首句秋風嫋二入僧窻石本秋作西入作度三句劫恨大梁三日醉石本大作汴四句不來超化作重陽石本

超化作此處作字作過往寓京師凌仲子屬予在浙川覓遺山石刻今得此足以塞責矣後有正書云丙辰秋過游超藍此詩留題于主僧仁公方丈歲遠恐其湮沒今以傳次諸石時至治壬戌春二月二日渤海大口記

涇縣尹蘇公政蹟記

行書至治二年仲春

記前列翰林學士承旨榮祿大夫知制誥兼修國史趙孟頫書國子博士承事郎為篆額者名已鐫毀亞中大夫寧國路總管府達魯花赤兼管內勸農事名用蒙古字當時立石人也其文則涇縣儒學教諭梅震記附書碑後蓋以官階序也元史百官志亞中大夫舊為少中延祐改亞中題銜與史合志又稱諸路各設儒學教授一員及學正一

員學錄一員其散府上中州亦設教授一員下設學正一員至于縣設教諭史不及之攷博山石馬村古佛院至元二十五年碑刻是益都縣顏神教諭鄭琥書此亦縣之教諭一証也文云公名濟字汝舟山東益都沂人延祐丙午宰是邑自興學勸農諸多惠政中有捐帑買基殿三皇表醫學以總之又云興養濟而院之攷宋置安濟坊養民之貧病者元時乃易爲養濟之號有司失于奉行不實民其窮無告矣蘇君之爲政所謂致誠而行也其不傳于良吏史失錄也記又稱詔條慎擇守令以五事論選與史文載世祖始立各道勸農使又用五事課守令以勸農繫其銜者相符

元應張真人道行碑

正書泰定四年四月在涿州

碑前列翰林學士太中大夫知制誥同修國史吳澄文光祿大夫議中書省事平章王毅書翰林學士承旨榮祿大夫知制誥兼修國史劉廣篆額元史武宗紀至大元年十二月甲戌以平章政事商議中書省事百官志至元二十九年罷尙書省增中書平章爲五員而一員爲商議省事今碑所題王毅議中書省事與官制符然志稱成宗元貞元年改商議省事爲平章軍國重事自是不書復置而毅署銜當泰定時仍有議中書省事必其後更爲設員史疎記也毅見泰定帝紀當四年三月召太子賓客王毅復職今所題銜蓋舊臣也廢本傳泰定元年加光祿大夫案

草廬撰碑文自稱泰定二年春於時賡方階榮祿大夫榮祿次光祿之下則元年必非加光祿矣史載真大道教並依此碑入傳而事跡特略碑云師張氏乾州奉天八年十六從天實李師爲道流錫名清志傳不書其籍又倒訛清志爲志清碑云入東海大珠牢山傳脫大字碑書酈希成傳以成作誠凡是數者悉與碑相違而清志道力所在有神異史慮其跡涉怪妄削之不書是也若母嘗病疽口吮其膿遂得蘇差又患膈氣疾幾不採師禱神進藥不寢食四旬母忽吐涎塊如瓜漸底平復居喪致哀於儒家喪制不倖此蓋爲獨行之尤而不囿於彼教法者傳惟以事親孝該之母亦沒其實與予故爲著之

涿郡歷代名賢碑

正書天歷二年六月在涿州

碑前列賜進士出身翰林待制兼國史院編修官盧氏歐陽元撰并書賜進士及第中書右司郎中太子左贊善濟南張起巖篆額元史列傳起巖遷中書右司員外郎進左司郎中兼經筵官拜太子右贊善以碑証之實爲右司郎中及右贊善傳文誤也碑据前史所占籍者約其出處大畧刻疏左方自西漢蒯通迄金梁塘而止然史記淮陰侯傳稱齊人蒯通疑范陽爲齊之近邑與涿郡不相屬又通以辨亂導人背其所主而躋諸名賢之目採摭失其倫矣碑後載通奉大夫河南江北等處行中書省叅知政事護軍追封范陽郡公諡端靖弭禮嘉議大夫工部尙書宋惟

忠中憲大夫中山知府張汝揖奉議大夫大都路涿州達魯花赤兼管本州諸軍與魯勸農事山壽等立石案弭禮官至叅知政事史既無傳特書銜于此而碑記諸賢皆書名獨昭烈帝稱字特例書之尊之也碑末金玉府石匠頭目中統二年初立金玉局至元三年改總管府故署金玉府者以此

真定路加葺宣聖廟碑

八分書至順三年六月

碑前列集賢直學士朝請大夫國子祭酒字木魯狝撰奎章閣侍書學士翰林侍講學士通奉大夫知制誥同修國史虞集書并題額二君元史列傳載歷官與碑略符狝惟失書階朝請大夫集失書翰林侍講學士及知制誥而已

又稱狝文章簡奧典雅深合古法予觀此記正稱其實非謬許也記云初鎮州置真定路以中山冀晉趙深懿府一州五土地人民奉睿宗景襄仁聖皇帝顯懿莊聖皇后湯沐首務立學養士睿宗傳不載此事而睿宗諡號傳所書者憲宗立追諡曰英武皇帝世祖至元二年改諡景襄皇帝其仁聖二字或由後崇奉晉加紀錄者不及採也記云世祖淵潛朔庭聞鎮之學緩未卽敘龍集丁未勅有可以金粟岡廟址崇殿廡開闢口至元暨今雖屢加葺猶有未備至順辛未憲暨府義倡集募役先是府尹馬斯虎已基未構而去口口餘年尹張忙兀台倅和元升治中和則平繼至始克有濟攷龍集丁未實定宗二年迨至順辛未已

八十五年一廟之興數閱世而成蓋有數存焉

魏王輔嗣墓碣

右題八分書大徑四寸文云偃師伯王輔嗣之墓翰林待制吳炳書元統二年冬十月偃師縣尹時禎立石元史文宗紀至順二年特命河南儒士吳炳爲藝文監典簿仍于對品階卽此書碣人也歸賜傳賜汴梁人力拒不從賊賊敗汙賊者皆獲罪賜獨免同里有吳炳者嘗以翰林待制徵不起賊呼炳司卯酉歷炳不敢辭時人爲之語曰歸賜出角吳炳無光賊爲范孟當後至元五年十一月炳始末可見如是漢淮源桐栢廟碑亦稱翰林待制浚儀吳炳重書子嗣昌填摹上石今此碑作河南浚儀舉古名河南則

當時省名書之耳未竹垞桐栢廟跋云歐陽氏謂其文字斷續而是碑甚完好疑爲後人重摹蓋吳炳嘗重書竹垞未見後題也

達本長老勤跡碑

正書賈昌文撰乃達而海牙書至正二年八月在偃師縣緱氏鎮

碑前題稱帝師法旨加號達本長老爲慧光普應大禪師

元史釋老傳八思巴卒賜號皇天之下一人之上宣文輔

治大聖至德普覺眞智佐國如意大寶法王西天佛子大

元帝師後其徒嗣爲帝師元貞元年又更賜雙龍盤紐白

玉印文曰大元帝師統領諸國僧尼中興釋教之印然則

達本所由得號當以帝師加之也傳稱帝師之命與詔勅

並行于西土今以此碑所云法旨其崇信又不獨西土爲

然而文記達本修復寺殿推爲百廢具舉達本信其教法之善護持者與又云寺名永慶在宋時諸帝陵寢皆以永名芝田縣作五品之軍名永安命此寺爲永慶皆與山陵同名宋史地理志永安赤奉陵寢景德四年升鎮爲縣無言以帝后陵所在命永安爲軍方輿紀要永安城在縣西四十里宋太祖昭武帝葬于此曰永安陵景德四年割鞏偃師二縣置縣以奉陵寢後爲永安軍亦未言置于何時攷徽宗紀政和三年三月戊辰升永安縣爲永安軍又牛臯傳孟邦傑復永安軍翟興傳金人犯河陽鞏縣永安軍孟邦雄墓志言葬于永安軍芝田鄉蘇村之原當僞齊皇昌四年卽紹興甲寅也錄此以爲志文舉遺

魯山縣建醫學講堂記

正書至正四年五月在魯山縣

記列賜進士從仕郎南陽府梁縣尹兼管本縣諸軍與勸農事周尙文撰承事郎南陽府郟縣尹兼管本縣諸軍與魯勸農事楊守正篆額南陽府魯山縣尉劉德修書丹蓋魯山醫學講堂因縣尹劉君修建遂勒其事如是劉君名毅字德剛曹南磐石人也後列魯山縣醫學教諭楊亨立石元典章至元二十二年設各路醫學教授學正訓誨醫生照依降去十三科題目每月習課醫義一道年終置簿申覆尙醫監較優劣云此記講堂之設殆謂是也然縣各置一教諭較前設官更密而史志亦不悉收吾故于此著之

重修中嶽廟碑 正書在登封縣嶽廟峻極門東至正猪兒年

碑記申飭軍民不許肆擾嶽廟住持之事其文特以國語通俗為之元史泰定紀即位之詔尙如此蓋取便于曉諭故也刑罰志禁令內載諸嶽瀆祠廟輒敢觸犯作踐者禁之與碑所記合其序元朝諸帝首云成吉思皇帝太祖紀元年羣臣上尊號曰成吉思皇帝以此例之下云月濶台皇帝為太宗薛禪皇帝為世祖完澤篤皇帝為成宗曲律皇帝為武宗普顏篤皇帝為仁宗格堅皇帝為英宗忽都篤皇帝為明宗札牙篤皇帝為文宗亦憐真班皇帝為寧宗皆諡號也月濶台史云太宗諱窩濶臺譯音無正字聲相近者假借為之然史稱諱窩濶臺而碑以曉示軍人

用顯斥於義必非所安疑當時淳質之俗如古帝因名為號是以碑得直書之也碑稱札牙篤皇帝予頃寓歷下得東嶽廟元至正四年聖旨碑述自成吉思皇帝至亦憐真班皇帝惟不紀札牙篤皇帝與此異或初以其與於弒逆黜之而後復紀其號與 文宗紀載後至元六年六月以帝謀為不軌使明宗飲恨而崩詔除其廟主載除廟主詔文順碑書年用支而不用干其稱猪帝紀又載此詔未暇勘正 兒年者至正七年歲次丁亥也

哈刺魯公墓碑 正書趙孟頫撰舉出鉅臺書至正七年八月在汝州

碑載哈刺魯公上世居朔漠父八黑馬當太祖聖武皇帝時用哈刺解傳稱哈魯氏故此碑云魯公侍臣薦從四太子南伐金定中原留鎮汝州生武畧公名虎口赤即此碑

題稱武畧將軍者也碑言四太子宗室世系表太祖皇帝  
 六子次四拖雷即睿宗也以碑証之當時有四太子之號  
 而睿宗傳失載幼以父歿于敵舉字孤之典收置戎行征  
 李坦圍襄樊鏖戰功多授努軍百戶坦即李壇也又授敦  
 武校尉管軍百戶戍口渚瀕江多虎公嘗射之羣獸伏不  
 敢動時平章奧魯赤愛其絕藝按奧魯赤本傳二十三年  
 春拜湖廣等處行中書省平章政事與碑合碑又載選充  
 蒙古侍衛親軍百戶至元間乃口帳公力戰追至北海手  
 擒逆黨忙哥案碑于乃下字殘滅當為顏字世祖紀元至二  
 十四年夏四月諸王乃顏反是其事也哈刺魯公後歷官  
 臨清御河運糧官又授金符進階忠翊校尉南劍翼管軍

千戶所達魯花赤大德丙午卒于官所則成宗改元十年  
 也墓汝州東吳氏堡追封梁縣男案後立碑為孫口所立  
 蓋家于汝州蒙古色目人多隨便居住是也

正議大夫吳恭祖神道碑銘

正書至正九年六月在孟縣

碑為翰林學士承旨榮祿大夫知制誥同修國史歐陽元  
 撰中大夫禮部尚書王口書銀青榮祿大夫御史大夫口  
 惟一篆額文云吳恭祖字景莊年十八近臣也里失班賀  
 伯顏李叔固以見世祖一見而奇之賜名忙古解令入宿

衛至元二十九年貴臣徹里出為福建等處行中書省平  
 章政事入奏請以公為本省理問官授奉訓大夫大德二  
 年進奉政大夫台州路治中遷衢州路治中至大二年陞



中順大夫福寧州尹延祐二年口中大夫建寧路總管後  
興化路未至丁外艱泰定二年擢正議大夫江州總管至  
順初改福州路總管年未滿七十移文告老數年乃終于  
家恭祖史不爲立傳然以徹里之忠亮薦致爲屬固亦賢  
矣徹里本傳進拜御史中丞俄陞福建行省平章政事與  
碑合而傳未載其歲月得此乃知其當至元二十九年也  
恭祖多厚德所在稱治其事跡具此碑有圭齋集可按予  
故據其歷官遷擢之次附于篇

重修五龍堂記

行書至正  
十三年

癸丑春予寓歷下時游潭西精舍精舍之建在城西門外  
五龍堂故有元至正癸巳重修碑記砌置墻間字已多

滅其前題孔顏孟三氏教授趙本撰承務郎同知濟南路  
總管府事世賢書翰林直學士太中大夫段弼題額元史  
世祖紀中統二年九月戊辰大司農姚樞請以儒人楊庸  
教孔顏孟三氏子孫詔以庸爲教授張璠傳大臣薦諸朝  
特命爲孔顏孟三氏教授今証之此記三氏學設官終元  
之世未有易也文云至正壬辰徐淮□□天兵南討順帝  
紀至正十二年秋七月辛巳命通政院使答兒麻失里與  
樞密副使禿堅不花討徐州賊八月丁卯詔脫脫以答刺  
罕太傅中書右丞相分省于外督制諸處軍馬討徐州卽  
其事然史言出師在七月八月而碑稱天子以山東地鄰  
徐淮命楊公王公使監山東以三月修城卽書于天兵南

討之下于時徐寇猖獗命師先有成議故耳後又題憲公  
乃延祐□□御史中丞夔國公之子公名文書納字國賢  
自號雙泉順帝紀十年九月三皇歲祀以醫官行事江西  
廉訪使文殊納建言禮有未備卽此結銜文書納書殊譯  
音借用無正字稱歲君癸巳與他碑稱歲次歲在者亦異  
山東鄉試題名碑記正書至正二十二年

碑在濟南府學明倫堂西偏半埋于土余手剔其文讀之  
尙可屬次所云皇帝命忠襄獻武王帥師平齊魯之年屬  
天下大比五請復舊制是秋其子中書平章河南山東知  
□皇太子擴公元臣繼承闕寄首述是事以刑部孫翥同  
儒學提舉吳君伯璋兵部員外郎龍君子鱗較其文戶部

侍郎倪君孟□蒞其事元史察罕帖木兒傳六月爲王士  
誠所刺詔追封忠襄王諡獻武及葬改諡忠襄順帝紀書  
改諡之文在十一月然則此碑立于秋故猶稱獻武也是  
科合格充正榜者凡廿一人文理通貫充副榜者又五人  
其記則朝列大夫刑部侍郎孫翥爲之翥見察罕帖木兒  
傳分門政沐城者當卽其人又徵事郎河南江北等處行  
中書省儒學提舉吳□題額奉訓大夫中書右司員外郎  
權左司員外郎趙恒書丹俱顯存選舉志每處差考試官  
同考試各一員並於見任并在閑有德望文學常選官內  
選差蓋不由京官出使考校然暢師文傳言爲翰林學士  
延祐四年主試河南歸卒于傳舍及此碑翥與于鱗結銜


則亦以京朝官主試而吳結銜又以外行省聘請考官  
或由元之季世兼此兩制用之也

任公孝思記

正書在  
高密

碑首列授司天臺劄付四州陰陽剋擇官王彥琛書丹次  
列淦川蕭璧撰蓋以書丹冠于撰文之前當由彥琛有官  
階也元史百官志中統元年因金人舊制立司天臺設官  
屬此碑殘剝已失年月按文既稱司天臺則立石必中統  
以後矣碑述任氏先居膠東夷安之梁尹村有諱福者金  
朝屢仕至高密縣尹生一字曰興宗當元朝授管民百戶  
興宗三子次曰全全次子曰川隨李璫復璫海以功授百  
戶大軍攻樊城先登陷陣得授正百管軍自渡江以來累

獲功績遂權千戶印根隨西里罕北征祇授忠顯校尉管  
軍總把於安慶屯守移鎮常州於時十三年六十有二每  
思祖考尙在淺土欲卜葬祖塋之西南下文多不屬李璫  
傳憲宗七年調其兵赴行在璫親詣帝言曰益都乃宋航  
海要津分軍非便帝然之命璫歸取漣海數州璫遂發兵  
攻拔漣水相連四城碑載川隨李璫復漣海者卽指其事  
然未幾從大軍攻樊城蓋能以武勇起其家宜世有後也  
川裔孫大鶴青田手摹此文屬予書之予獲交于青田自  
益都楊書巖學齋予今已窮廢爲人授徒而兩君踪跡不  
復可聞念此爲惘然者久之



授堂金石文字續跋卷十四終

受業密縣李

